



BIBLIOTHECA  
UNIV JAGELL  
CRACOVENSIS

587120

Mag. St. Dr.

1

QUINQUAGINTA  
RATIONES

&

MOTIVA,

Cur in tanta varietate Religio-  
num & Confessionum Fidei, in  
Christianitate moderno tempore vi-  
gentium, sola Religio Romano  
Catholica, sit eligenda, & omni-  
bus aliis preferenda.

A quodam

NEO-CATHOLICO

Omnibus Dominis

ACATHOLICIS

OBLATA.

Olim Tynnaviæ Typis Academicis  
impressa Anno 1702.

Nunc reimpressa Anno 1734.

Typis Coll: Varsav: Societatis JESU.

Coll:ii Vindob: Soc:

XXXVIII <sup>10</sup>/<sub>36</sub>

248

80






*Libellus hic uti summe proficius Reimprimatur. In quarum fidem manum meam appono.*

Gvilhelmus Robertson Auditor Generalis & Judex:

587 120 mp.



Bibl Jag

1972. K99 Jt. Dr



## PROLOQUIUM.

**P**ostquam complures annos magno studio & summa diligentia ac sedulitate in investiganda vera Religione & Fide salvisca, (quam unicam esse sciebam) insumpsissem, solius veritatis indaganda gratia, & amore salutis aeternae, longissimoque tempore anceps animo haesissem, quam nam ex tam diversis Religionibus ac Confessionibus tenere deberem? atque hunc in finem, varias Academias & Universitates obivissem, plurimos Authores & Scriptores de modernis Fidei Controversijs tractantes tam Catholicos, quam A catholicos evolvissem, multos Do-

A 2

ctores



doctores diversarum Religionum ac  
Confessionum consuluissem, varijs  
publicis disputationibus de his ma-  
terijs interfuissem, ac ipsemet quo-  
que, cum primarijs viris singularum  
sectarum, Confessionum, ac Religio-  
num, privata colloquia hac de re  
instituissem, dubia mea tam Catho-  
licis, quam A catholicis proposui-  
sem, neque tamen id, quod unicè  
desiderabam consequi ac obtinere  
valuissem. Tandem statui mecum,  
opportunitatem tempus & locum mihi  
eligere, in quo sepositis omnibus  
alijs curis, ac negotijs, in hoc uni-  
cum negotium negotiorum omni-  
um maximum (utpote aeternam fe-  
licitatem aut infelicitatem concer-  
nens) totus quantus incumberem,  
& illud in seriam deliberationem as-  
sumerem. Atque ut hujus delibe-  
rationis salutare animæ meæ effe-  
ctum, totiesque exoptatum finem  
asse-

assequer, sequentia eidem judica-  
vi præmittere:

*Primò.* Auxilium & gratiam  
Spiritus Sancti, impensè implora-  
re, ac lumen veræ Fidei, à DEO tan-  
quam à Patre luminum, qui illumi-  
nat omnem hominem venientem  
in hunc mundum, magnis votis ex-  
poscere (Fides siquidem est singula-  
re donum DEI, quo illustratur ho-  
mo ad assentiendum omnibus, quæ  
DEUS nobis revelavit.)

*Secundò.* Constitui ac firmiter  
proposui, me à vitijs per gratiam  
DEI continere, notum siquidem ha-  
bui, quoniam in malevolam animam  
non intrabit sapientia, nec habitabit  
in corpore subdito peccatis, & certus  
sum, ac fui, plurimos retardari ab  
agnitione veræ Fidei, eaque ample-  
ctenda, ex eo, quòd sint irretiti mul-  
tis vitijs, sed præsertim carnalibus.

*Tertiò.* Deposui omnem affe-  
ctum

etum privatum, & magis inclinanti-  
tem ad unam, potius Religionem,  
quàm ad alteram, omnemque præ-  
conceptam finistram opinionem de  
altera; sed statui me coram DEO,  
penitus indifferentem, ad hanc vel  
illam Religionem eligendam, pro-  
ut mihi Spiritus Sancti gratia, ac  
recta ratio, absque omni affectione  
privati commodi, & timore alicujus  
incommodi temporalis, dictave-  
rit.

*Quartò.* Hanc deliberationem  
& electionem ita conatus sum insti-  
tuere, sicut optassem illam institu-  
isse in hora mortis, & in extremo  
die judicii, & rationem dare DEO,  
cur potius hanc religionem ele-  
gerim, & non aliquam aliam. Un-  
de proposui in animo, ut si in ali-  
qua Religione vel minimum erro-  
rem in dogmate Fidei reperero, ean-  
dem illico rejiciam, neque amplius

in materiam deliberationis assu-  
mam. Ecclesia enim DEI vivi, de-  
bet esse, & est, Columna & firma-  
mentum veritatis. Tim. 3. V. 15.  
Sed Columna veritatis nullum ful-  
cit errorem, ergo vera Ecclesia DEI  
nullum in Fidei dogmate debet ha-  
bere errorem. His præmissis ut fun-  
damentaliter procederem, præsup-  
posui, primò certa infallibilia funda-  
menta Fidei Christianæ, & in quibus  
omnes Religiones Christianæ, licet  
inter se differentes, convenire de-  
bent, & quæ negari non possunt ab  
ullo Christiano, sine summæ impie-  
tatis, blasphemix, & Atheismi nota  
Præsupposui. 2do Principia rectæ  
rationi conformia in eligendis re-  
bus, quæ ab omnibus prudentibus  
admittuntur, quæ qui rejicere vel-  
let merito argueretur magnæ im-  
prudentiæ.



Porro fundamenta in quibus omnes Christianæ Religiones conveniunt, sunt;

1. Datur Deus verus & Unus.
2. Hic Deus est ens perfectissimum, essentialiter includens omnem perfectionem, & excludens omnem omnino imperfectionem.
3. Hinc essentialiter est verax, ita ut nec falli nec fallere possit. nec falsum dicere, seu nec aliter rem aliquam revelare quàm sicut eam cognoscit, nec aliter eam cognoscere quàm sit in se, adeoque tam in cognoscendo quàm in dicendo est essentialiter verax.
4. Est omnipotens. Apud quem omnia sunt possibilia Matt. 1. & non est impossibile apud DEUM omne verbum Lucæ 1. Licet illud humano aut etiam Angelico intellectu, comprehendi non possit.

5. Deus

5. DEUS est Fidelis, absque ulla iniquitate, justus & Rectus. Deutor. 32. v. 4.

6. DEUS est immutabilis. Non est DEUS quasi homo ut mentiatur, nec ut Filius hominis ut mutetur. Num. 23. apud quem non est transmutatio, nec vicissitudinis adumbratio. Jacob. 1. v. 16. quidquid igitur DEUS revelat, verum est, & simul possibile; & quidquid promittit, id potest & vult præstare, & præstabit infallibiliter.

7. Deus est sapientissimus. Cujus sapientia non est numerus. Psal. 146.

8. DEUS est infinitæ misericordiæ, Dominator Dominus, DEUS misericors & clemens, patiens & multæ miserationis. Exod. 34. Et misericordia Domini plena est terra. Psal. 118.

9. DEUS est justus. Est Remunerator bonorum, & Vindex malorum. Justus in omnibus vijs suis. Psal.

A 5

*Psalm. 144. V. 18. Credere oportet accedentem ad DEUM quia est, & inquitrentibus se Renumerator sit. Ad Heb. 11. V. 6.*

10. DEUS est summa Sanctitas, & summa Bonitas & Benignitas, Sanctus, Sanctus, Sanctus, Dominus DEUS Sabaoth. *Isai. 4.* Et Sanctus non solum in se, sed & in omnibus operibus suis. *Psalm. 144. V. 17.* Hoc igitur sit certum ac indubitatum quod quaecunque Doctrina continet aliquid his divinis perfectionibus repugnans, simpliciter falsa sit, & omnis secta quæ talem doctrinam pro Fidei dogmate habet, sit erronea ac proinde absolute reiicienda, neque in materiam deliberationis assumenda.

11. Unicam homo habet animam, quam necesse est aut damnari, aut salvari per totam æternitatem. *Quid autem proderit homini etiam si*  
uni-

*universum mundum lucratur; anima vero sua detrimentum pariat, aut quam dabit homo commutationem pro anima sua?*

12. Aeternitas est, cuius finis nullus, cuius mensura semper, est series infinita temporum, est numerus sæculorum sine termino.

13. Finiti ad infinitum nulla est comparatio, O felix beatorum æternitas, omifera damnatorum/hæc æternitas alterutra, nos expectat, sine vera Fide, illa non obtinetur. Ergo si hanc non habuerimus, altera infelicissima infallibiliter nos manet.

### PRINCIPIA PRUDENTIÆ,

*In rebus præsertim summi momenti eligendis.*

I. **I**N electione & præelectione rerum, præferenda sunt maiora bona, minus bonis, & à fortiiori ipsis malis; certa, incertis ac dubi-



dubijs, vera falsis, perpetua ad breve tempus durabilibus, aeterna quibuscunque temporalibus, conformia rectae rationi, eidem diffor-  
mibus.

2. Ad finem unicè desiderabilem obtinendum, adhibenda sunt media apposita & proportionata, & potius magis certa, quam minus certa, vel omnino incerta.


3. Ex medijs ad salutem aeternam consequendam, illa sunt certiora, per quae constat multos consecutos esse salutem aeternam, quam ea, per quae neminem certò constat, eam adeptum fuisse.

4. Illa quoque media ad salutem sunt certiora, quae adhibenda suadet recta ratio, & autoritas Virorum sapientum, ac eximijs virtutibus praedictorum, & Sanctorum, aut quae suggerit ipse Spiritus DEI; quam quae dicat caro, sanguis, mundus, &  
vita

vita licentia, ac libertas. *Spiritus enim est qui vivificat, caro non prodest quidquam.* Joh. 6. v. 64: *Qui enim in secundum carnem sunt, quae carnis sunt, sapiunt; qui verò secundum Spiritum sunt; quae sunt Spiritus sentiunt.* Nam prudentia carnis mors est: prudentia autem Spiritus, vita & pax, quoniam sapientia carnis inimica est DEO. Ad Rom. 8. v. 5. 6. 7. 8. *Qui autem in carne sunt, DEO placere non possunt.*

His fundamentis & prudentiae principijs in eligendis rebus praesuppositis, institui sequentes considerationes, ex quibus erui convincentia motiva, cur potius elegerim, & amplexus fuerim Fidem Romano-Catholicam, quam ullam aliam sectam, ex illis, quae nunc in Christianitate vigent, curque omnes ceteras Religiones repudiaverim.





## CONSIDERATIO PRIMA.

**P**RO prima itaque consideratione  
 assumpsi in deliberationem, utrum  
 melius fecero, si me adjunxero Sta-  
 tuti Catholico vel Evangelico (quo  
 titulo gloriantur in Hungaria Luthe-  
 rani & Calvinistæ simul.) Et quidem  
 quædam, & qualis sit Status Catho-  
 licus, illico intellexi, nempe quod  
 sit eorum qui sequuntur Fidem Ro-  
 manam per totum orbem terrarum,  
 semper & ubique, ac in omnibus  
 Articulis Fidei sibi æqualem ac simi-  
 lem. Circa autem statum Evangeli-  
 cum, statim impegi in periculosissi-  
 mum scopulum; sic enim mecum ra-  
 tiocinabar. Status Evangelicus de-  
 beret ille esse qui tenet doctrinam,  
 per omnia Evangelio conformem.

Atqui

Atqui doctrina quam tenent Luthe-  
 rani & Calvinistæ simul, non potest  
 esse conformis Evangelio. Duæ si-  
 quidem doctrinæ sibi contrariæ vel  
 planè contradictoriæ simul non pos-  
 sunt esse conformes eidem veritati  
 Evangelicæ, sed alterutra earum ne-  
 cessariò debet esse difformis eidem.  
 Constat verò doctrinam Luthera-  
 norum & Calvinistarum in multis  
 Articulis Fidei sibi esse contrarias &  
 planè in aliquibus contradictorias.  
 Ergo utraque simul non potest esse  
 conformis veritati Evangelicæ. Er-  
 go non possunt constituere unum  
 statum Evangelicum, adeoque hic  
 status, est omninò chymericus. Ego  
 autem nolui in hac mea electione  
 & deliberatione venari chymeras,  
 sed indagare ipsam veritatem rerum  
 Fide Divina credendarum. Igitur  
 hic status Evangelicus non cadit sub  
 meam electionem & consequenter  
 illum

illum ab eâ prorsus judicavi rejiciendum.

## CONSIDERATIO II.

**D**Eindè institui hanc considerationem. Cùm Calvinistica & Lutherana Religio simul utraque non possit dici Evangelica, an saltem alterutra, & seorsim illarum aliqua sit Evangelica, adeoque una alteri præferenda & consequenter hæc potius quàm illa præeligenda, sed rursus hæsi. Ratio siquidem ipsa mihi dictavit in prælectione unius rei præ altera, debere esse potiores Rationes pro una parte, quàm pro altera. Non potui autem invenire potiorè rationem, cur Lutherana doctrina debeat dici Evangelica, quàm Calviniana, nec è contra; sed neque ab ipsis Lutheranis & Calvinistis hanc extorquere potui. Nam utraque pars citabat pro se aliquos textus Evangelij,

lij, & circa citatum textum Lutherani aliter eundem interpretabantur, aliter item Calvinistæ. Et illi asserebant suam interpretationem esse veram ac genuinam, & Calvinistarum falsam, & è contra Calvinistæ suam interpretationem esse veram & Lutheranorum falsam. Utraque autem pars veritatem suæ interpretationis probabat ex dictamine proprii Spiritûs, qui erant sibi prorsus oppositi, & neutra pars potuit assignare rationem vel motivum, cur potius alterius privatus Spiritus & Criticiorum aberret à veritate interpretationis & non suus. Non potui proinde inter has duas doctrinas, unam potius eligere quàm alteram. Ergo utramque judicabam rejiciendam.

## CONSIDERATIO III.

**I**llud quoque capere non potui, quo fundamento Lutherani & Calvi-



Calvinistæ excludant à statu suo Evangelico, Anabaptistas vel Arianos. Nam hi eodem planè jure, dicunt se debere vocari Evangelicos & suas doctrinas conformes esse Evangelicæ veritati. Imò à potiori, quàm Lutherani & Calvinistæ. Anabaptistæ siquidem dicunt: In Evangelio nullibi legimus infantes esse baptizatos; Imò Christus dicit: *Qui crediderit & baptizatus fuerit hic salvus erit.* Ergo Fides debet præcedere Baptismum, Fides autem non datur nisi in adultis, ergo ante adultam ætatem nemo debet baptizari. Ergo nostra doctrina est conformior Evangelio, quàm Lutheranorum & Calvinistarum admittentium baptismum puerorum. Ariani pariter dicunt: In Evangelio expresse dicit Christus *Pater major me est.* Ergo nos, juxta Evangelium docemus Filium in Divinis non esse æqualem Patri sed mi-

minorem Patre. Nec admittimus in præsentī Textu interpretationem SS. PPm. Filium esse minorem Patre secundum humanitatem, æqualem verò secundum Divinitatem ( si ea contra nos adducatur à Lutheranis & Calvinistis) Quia & ipsi Lutherani & Calvinistæ, in materijs controversis inter se & Catholicos, interpretationem SS. PP. rejciunt. Nec est major ratio, cur in hoc puncto authoritas PP. deberet valere, & non in alijs materijs Fidei?

Si verò ipsi suam & privati sui Spiritus interpretationem adducant, petent sibi eandem interpretationem ostendi in scriptura expressis terminis, cum utraque pars admittat quòd nihil sit credendum, nisi quòd expresse & explicitè ac clarè in scriptura Sacra habeatur.

CONSIDERATIO IV.

**I**N præfenti consideratione occurrat mihi monitum illud scripturæ Sacræ; *State super vias & videte & interrogate de semitis antiquis, quæ sit via bona & ambulate in ea.* Jerem. 6. & judicavi apud me illam viam ad Cælum esse meliorem, securiorem, & magis certam ac tutam, per quam constat quàm plurimos jam pervenisse ad cælum, quàm illam per quam hactenus neminem constat ad cælum pervenisse. Subsumpsi deinde. At qui pro certo constat quòd multi qui in Fide Romano-Catholica vixerunt & mortui sunt, salvati sint; quòd verò aliqui, alias Religiones tenentes salvati sint, certò non constat; Et inde intuli: Fidem Romano-Catholicam certiore viam esse ad salutem consequendam, quàm quancunque aliam Religionem, ac proinde hanc præ alijs eligendam.

CON-

CONSIDERATIO V.

**H**Inc ulterius sic argumentabar. Omnis qui salvatur, placet Deo. Atqui sine vera Fide nemo potest placere Deo. Ergo Fides & Religio illa per quam quis salvari potest, est vera. sed indubium est multos tenentes Fidem & Religionem Romano-Catholicam salvatos fuisse (Quod nec ipsi quidem Adversarij negare audent) ergo Fides Romano-Catholica est vera Fides ac Religio. Ergo hæc est eligenda.

CONSIDERATIO VI.

**H**Inc rursus sic arguebam: Sicut unus est DEUS verus, ita & una Fides est vera; juxta illud S. Pauli: *unus Dominus, una Fides unum Baptisma.* Ad Ephes. 4. v. 4. Una igitur est Fides vera & salvifica, sicut unus est Dominus, sive DEUS. Ergo si Catholica Fides est vera



vera & salvifica ( ut ostensum est )  
Reliqua Religionum genera non ha-  
bent rationem veræ Fidei , neque  
extra Fidem Catholicam datur salus.  
Ergo Fides Catholica est præ cæteris  
mihi eligenda.

### CONSIDERATIO VII.

**S**ed & illud me plurimum confir-  
mavit , in proposito ad ample-  
ctendam Fidem Romano-Catholi-  
cam , quod Catholicos salvari posse  
etiam Hæretici profiteantur , Catho-  
lici autem firmissimâ Fide credunt  
neminem extra Ecclesiam Romano-  
Catholicam salvari posse. Quæ ergo  
dementia foret , cum Catholicis non  
stare , ( quos etiam Adversarij salvari  
posse admittunt ) sed cum Acatholi-  
cis , quos Catholici salvari posse ne-  
gant. Cui enim non suaderem  
tutiorum in periculosissimo discrimi-  
ne viam. Illa autem est tu-  
rior

tior , quam probat utraque pars , licet  
sibi adversaria , quàm illa , quam una  
tantum pars probat , altera etiam ju-  
rando reprobat. Sic nemo dubitat  
utriusque medici judicio medicinam  
probatam tutius accipi , quàm alte-  
rius judicio damnatam ut mortiferam ;

### CONSIDERATIO VIII.

**M**emor verò illius moniti De-  
utor. 32. *interroga Patrem  
ruum , & annuntiabit tibi , majores  
tuos & dicent tibi.* Et illius prover-  
bior. 22. *Non transgredieris termi-  
nos antiquos , quos posuerant Patres  
tui.* Consului libros veterum SS. PP.  
quid consilij ex ijs capere possem ,  
super hac quaestione ; Utrum Roma-  
no-Catholicam fidem , an aliquam ex  
alijs Religionibus amplecti debeam ?  
Ex his primus mihi occurrit S. Au-  
gustinus ( qui pariter ex Manicheo-  
rum hæresi conversus est ad Fidem  
Roma-

Romano-Catholicam) Simul addens rationem suæ conversionis Tom. 6. contra Epist. Fundam. cap. 4. hunc in modum: *Multi sunt qui in Ecclesia Catholica gremio me justissime tenent: Tenet consensus populorum, atque gentium: tenet Autoritas miraculis inchoata, spe nutrita, charitate aucta, vetustate firmata: tenet ab ipsa sede Petri Apostoli, cui pascendas oves Dominus commendavit usque ad presentem Episcopum successio Sacerdotum. Et cap. 17. de utilitate credendi. Dubitabimus nos in ejus Ecclesia condere gremio, que ab Apostolica Sede per successiones Episcoporum, hereticis partim consiliorum gravitate, partum miraculorum Majestate, damnatis, Culmen Autoritatis obtinuit? Alter hoc adhuc antiquior fuit S. Irenæus Lib. 3. cap. 3. sic scribens De Romana Ecclesia: *Ad hanc Ecclesiam, in qua sem-*  
per*

*per conservata ea, qua est ab Apostolis traditio. Tertius est Tertulianus in præscrip: cap. 36. Habes Romanam Unde nobis quoque Autoritas præsid est, statu felix Ecclesia, cui totam doctrinam Apostoli cum sanguine suo profuderunt. Quartus est San: Hieronymus Ep. 3. contra Rufinum cap. 4. Scito Romanam Fidem Pauli Autoritate munitam. ac in extremo dialogo adversus Luciferum! brevem (inquit) apertamque animi mei sententiam proferam; in illa Ecclesia esse permanendum, qua ab Apostolis fundata usque ad diem hunc durat. loquitur autem citato loco de Romana Ecclesia. Demum his accessit S. Nazianzenus, qui ad præsentem meam quæstionem sic respondet: (carmine de sua vita) *Fides Romana recta erat jam antiquitus, & recta perstat nunc etiam, nexu pio, quodcunque sol videt, devincens.**

B

Qui-



Quibus intellectis non potui non acquiescere horum sapientissimorum, & Sanctissimorum Patrum iudicio, decrevi proinde Fidem Romano Catholicam amplecti.

CONSIDERATIO IX.

**R**Ecurri dein ad alios Sanctos, & Sanctas DEI, & quæsi ex iis, in quam fide illi, & illæ vixerint, & per quam fidē ad salutem æternam pervenerint? & responderunt omnes, se in Fide Romana vixisse, & per hanc fidē & ad salutē æternam pervenisse. Sic mihi respondit, ex Episcopis S. Martinus, S. Nicolaus, S. Athanasius & plurimi alij. Sic ex Monachis, S. Dominicus, S. Franciscus &c. Sic ex Viduis S. Monica, S. Brigitta, S. Elisabetha, &c. Sic ex Virginibus S. Agatha, Lucia, Agnes, Catharina &c. Undē hanc feci Resolutionem, si hi

San-

eti, & hæ Sanctæ, hanc fidem tenētes pervenerunt ad Cœlestem gloriam, hæc profectō est tutissima, & securissima via ad Cœlū, & nulla alia quærenda.

CONSIDERATIO X.

**C**ONverti me postmodū ad Sanctos Martyres, & ex his quæsi, quānā fuerit illa fides, pro cuius veritate ipsi sanguinem suum fuderunt, exilia, & tantos cruciatus, ac tormenta tam patienter sustinuerunt, tam diuturnos carceres toleraverunt? & responderunt omnes, illam fidem non fuisse aliam, quā Romano-Catholicam. Sic responderunt mihi, Tres & triginta Martyrio affecti Romani Pōtiffes. Sic Cornelius, & Cyprianus, sic Fabianus & Sebastianus, sic S. Laurentius, sic S. Agatha, S. Cæcilia, S. Dorothea, S. Barbara, & innumeri alii, & alia. Conclufi proinde mecum,

B 2

fidem

fidem illam, in cuius veritatis Testimonium vitam suā deposuerunt, tam gloriose, tam hilariter, & libenter tot & tanti Testes, non posse non esse veram. Quomodo igitur amplius potui dubitare de Ecclesiæ Romano-Catholicæ Veritate?

#### CONSIDERATIO XI.

**D**Ejeci dein mentis oculos in Tartara, & vidi ibidem æternis cruciatibus torqueri Simonem Magū, Novatianum, Ariarium, Vigilantium, Pelagium, Nestorem, Macedonium, Marcionem, Machometem &c. & quæsi ex ijs, ob quam causam sint ignibus æternis addicti, & responderunt mihi: causam hanc damnationis suæ esse, quod recesserint ab Unitate Ecclesiæ Romano-Catholicæ, & Authores fuerint sectarum ab illa alienarum. Salubriter igitur mecum conclusi, quod si non volo cum

illis

illis æternum ardere, non debeam ab Ecclesia Catholica recedere.

#### CONSIDERATIO XII.

**N**emo est qui dubitare possit, S. Pauli Apostoli fidem fuisse veram, & Apostolicam Fidem. Atqui hæc fuit eadem cum Romana; uti ipsemet S. Apostolus testatur scribens ad Romanos I. *¶ II. Desidero simul consolari in vobis (Romani per eam, qua invicem est, fidem vestram, atque meam. Ergo Romana fides fuit, & est, vera, & Apostolica Fides. Et ipsi quoque adversarii concedunt veram, & Apostolicam ab initio fuisse, sed postea, dicunt eam defecisse (quod Romano Catholici constanter negant) dicunt id quidem illi, sed non probant. Nam si quis quærat ex illis: in quibus dogmatibus Fidei defecerit, &*

B 3

ubi?



ubi? ac quando? nihil certi adducere possunt: illis autem incumbere probatio. Profectò si certò constaret aliquam Familiam antiquissimæ Nobilitatis esse, & aliquis diceret, habuisse quidem olim illam Nobilitatis Prærogativam, sed postea eandem deperdidisse, talia dicenti incumbere probatio, quādo? & ex quibus causis eandem amiserit? quod si probare non posset, ad minimum in *Emenda lingua*, coram æquo Judice convinceretur.

### CONSIDERATIO XIII.

**C**Um in hac deliberatione essem: An scilicet Fidem Romano Catholicam præligere deberem, vel aliam ab ea alienam; nova se mihi objiciebat difficultas. Nempe hæc: Quòd si Catholicam Religionem rejicerem, iterum deberem aliam deliberationem instituere,

tuere, quamnam ex illis ab Ecclesia Romano-Catholica alienis præligere deberem. An Lutheranam? vel Calvinianam? aut Arianam? cum hæc Religiones in multis inter se discrepent, & ad invicem se gravissimorum errorum incusenr. Imo estò me jam ad unam ex istis eligendam determinarem, necdum esset finis deliberationis, siquidem hæc Religiones rursus sunt subdivisæ inter se; Et sic rursus instituere deberem novam deliberationem, quam nam ex tam diversis, & subdivisis tenere, & amplecti debeam. Præstabat igitur unà fidelis omnes has ex istis rationibus rejicere, & Fidem Romano-Catholicam amplecti. Cum *Deus dedit, usque ad consummationem Sanctorum, in opus Ministerii Pastores & Doctores in adificationem Corporis Christi, ne circumferatur omni vento doctrina in nequitia hominum, in a-*

*Stutia ad circumventionem Erroris.*  
Ad Ehes. 4. v. 14.

CONSIDERATIO XIV.

**I**llud mihi statim initio hujus de-  
liberationis proposueram. Quod  
in quacunque secta vel Religione,  
errorem in fide & contra rectam ra-  
tionem deprehendero, illam omnia  
uò velim rejicere, nec amplius in  
materiam electionis assumere. Exa-  
minavi proinde varia fidei dogma-  
ta modernarum Religionum à Roma-  
na Catholica alienarum ex funda-  
mentis & principiis in exordio hu-  
jus dissertationis præsuppositis, sic  
de iisdem sigillatim discurendo:  
Pro Exemplo primo posui hunc di-  
scursum. Deus est infinitæ sapietiae  
& infinitæ bonitatis, & imposuit no-  
bis certa præcepta, ob quorum trans-  
gressionem gravissimè & quidem in  
æternum homines punit. Ergo de-  
bent talia præcepta illa esse, quæ cū  
illius

illius gratia à nobis observari pos-  
sint, alias enim non esset sapiētissi-  
mus Legislator, nec esset Benignissi-  
mus Dominus; si propter transgressi-  
onē illorū, æternū homines puniret.  
Nemo enim dicet illum sapiētissi-  
mum esse Dominū, & simul Beni-  
gnissimū, qui servo suo præcipit id,  
quod absolutè præstare nō potest. V:  
G. ut solis cursum sistat, vel ut cœlū  
digito tangat, & propter hoc, quod  
præceptum sibi impossibile executi-  
oni non daret, gravissimis pœnis, &  
exquisitis tormentis, eum puniret,  
ac excrucicaret. Deus autē est Sapi-  
entissimus Legislator, & simul sum-  
mæ imò infinitæ bonitatis, & Beni-  
gnitatis. Ergo nobis nō proposuit ta-  
lia præcepta, quæ à nobis gratiā illi-  
us adjuvante observari non possint;  
Ergo falsū dogma fidei est omnium  
Novatorū, quòd præcepta Dei im-  
possibile sit à nobis, adjuvante illius



gratia observari.

Exemplum 2dum est. Deus est summæ bonitatis. Ergo nihil admittendū est in Deo quod repugnat ipsius bonitati. Repugnaret autem ipsius summæ bonitati si aliquem ante prævisa ulla illius demerita, purè ex sua voluntate, præordinaret ac reprobaret ad æternam damnationem, imò hoc sine illum crearet. Ergo talis reprobatio in Deo nō datur. Ergo falsum est hoc dogma Calvinistarū, adeoque reiiciendum, unā cum sua secta, quæ illud tenet.

Exemplum Tertium sit. Deus est essentialiter verax & omnipotens & nihil apud eum est impossibile. Ergo cū Christus (qui utique simul erat Deus) porrigendo in ultima coena panem, & vinum Discipulis suis, dixerat: *Hoc est corpus meum: Hic est sanguis meus.* Vel non dixit verum; & sic non est essentialiter verax.

verax. Vel non potest id facere, ut panis transeat in illius carnem, & Vinum in Sangvinem; & sic non est omnipotens, adeoq; nec Deus. Est autem Deus, ergo essentialiter Verax ac Omnipotens. Et cerè si Deus potuit ex nihilo creare Mundū, & Christus in Nuptiis Canæ Galileæ transmutare aquam in vinum, potuit & panem, ac vinum transmutare in corpus suū, ac Sangvinem suum. Ergo hoc Dogma Fidei Calvinistarū, qui negant in Eucharistia reale præsentiam Corporis & Sangvinis Christi, est falsum. Plura similia exempla adducemus in sequentibus.

#### CONSIDERATIO XV.

**I**N hoc examine dogmatum Fidei, alienarū Religiorum à Fide Romano-Catholica, reperi in ijs plurima paradoxa, prorsus incredibilia, & rationi rectæ penitus difformia. Exemplum sit. Docent inter reli-

B6 qua

qua, hoc etiam: quod omnia peccata sint æqualia, nec ullum dari peccatum, quod sit veniale, undè sic arguebam: Verbū otiosum est peccatum, cū Christus Dominus minetur de omni verbo otioso dandā esse nobis in diē iudicii rationem. Ergo secundū hoc Dogma Novatorum, est æquale reliquis peccatis. Ergo & peccato blasphemiar. Ergo & peccato incredulitatis. Ergo & Apostasia à Fide Christi. Si est æquale his peccatis peccatum otiosi verbi. Ergo est etiam æqualis culpæ. Si est æqualis culpæ; Ergo æquale meretur pœnam. Si æqualem meretur pœnam, Ergo etiam æqualem habet remissibilitatem, vel irremissibilitatem. Ergo æquè difficulter remittitur, ac alia peccata. Et tamē Christus de pœnis, & remissibilitate peccatorum longè aliud docuit; Nam Matth. 5. v. 22. dicit *Qui*

*irascitur Fratri suo reus erit iudicio, qui dixerit: Racca, reus erit concilio, qui dixerit: Fatue, reus erit gehennæ ignis.* Ergo iræ affectus erga proximum meretur quidem aliquam pœnam; sed maiorem, verbum acerbū, & adhuc maiorem verbum cōtumeliosum. Deindè 1. Joan. 5. v. 16. dicitur. *Est peccatum ad mortem.* Ergo est peccatum aliquod, quod non sit ad mortem. Ergo non omnia peccata sunt æqualia. Præterea est peccatum, quod neque in hoc, neque in alio sæculo remittitur. Quale est peccatum in Spiritum Sanctum. Ergo aliqua peccata sunt, quæ in hoc vel in alio sæculo remittuntur. Ergo non est æqualis remissibilitas in omnibus peccatis. Ergo nec æqualis culpa. Ergo non omnia peccata sunt æqualia. Deinde proverb. 24. v. 16. habetur. *Species enim cadit iustus & resurget;*



*Impii autem corrueunt in malum.* Ergo sunt aliqua peccata quæ non tollunt habitualement justitiã; & alia quæ eandem tollunt. Ergo omnia peccata non sunt æqualia. Ergo secta vel Religionem illam, quæ hoc falsum Dogma tenet, meritò judicavi esse rejiciendam.

#### CONSIDERATIO XVI.

**J**uxta eosdem, omnia nostra bona opera, sunt peccata. Et juxta eosdem omnia peccata sunt æqualia. Ergo omnia nostra bona opera, sunt æqualia peccata, reliquis peccatis: Igitur orare Deum erit æquale peccatum, ac blasphemare contra Deum: Et Eleëmofynã dare pauperi, erit æquale peccatum, ac eundem pauperem spoliare: & injustè possessam rem restituere proprio illius Domino, erit æquale peccatum, ac eandem apud se invito domino retinere.

CON-

#### CONSIDERATIO XVII.

**H**inc optarem scire. Quidnam deberet dicere, ac suadere aliquis prædicans, alicui consulenti se: Utrum rem alienam, quam injustè habet, debeat proprio illius Domino restituere? Nam si dicat, ita, posset is reponere quarendo: an restituere rem alienam sit opus bonum? Si is affirmaret, posset iterum proponens subsumere: Juxta nos omnia nostra bona opera sunt peccata: peccata autem iterum juxta nostram doctrinam sunt æqualia omnia: Ergo sive rem alienam restituero, sive retinuerō, æquale erit peccatum, nec unū majus altero. Quorum utrumque, judicavi esse absurdum, & consequenter, & sectas has doctrinas tenentes, ac docentes.

#### CONSIDERATIO XVIII.

**D**eus est summa sanctitas. Si ita, ergo est maximè remotus à peccato.

cato. Si hoc, ergo maximé odit peccatum, si hoc, ergo nullatenus illud vult fieri, si hoc, ergo illud non mandat fieri. Si hoc, ergo nullatenus illud causat. Ergo Deus non est Author & causa peccati, volens, suggerens, efficiens, jubens, operans, & in hoc impiorum scelerata consilia gubernans, ut docent Calvinistæ, & Lutherus quoque docuit.

#### CONSIDERATIO XIX.

**R**evolvi quàm plurimos historicos, tam politicos, quàm Ecclesiasticos, Annales item variarum Gentium, ac Nationum, & diligenter exquisivi, an alicubi ante sæculum decimum quintum, fuerit aliqua fama & mentio Lutheranicæ aut Calvinistæ doctrinæ, & aliarum modernarum Sectarum. Legi item ad hunc eundem finem, multa antiquissima scripta, & anotationes

nes rerum memorabilium, quæ singulis sæculis contigerunt, & nullam mentionem, vel vestigium illarum invenite potui. Unde conclusi has Religiones planè novas esse, adeoque non esse Apostolicas, nec à Christo & Apostolis traditas, sed ex cerebro Authorum harum Sectarum noviter exogitatas & consequenter repudiandas.

#### CONSIDERATIO XX.

**M**emini quidem me adhuc in Juventute legisse, cujusdam Calvinistæ libellum, sub titulo *Itinerarij* in quo conatur demonstrare longissimum Catalogum hunc in finem contexendo, quòd statim à Nativitate Christi, singulis sæculis fuerint aliqui, qui tenuerint doctrinam Lutheri & Calvini, sed pessimo successu & irritò conatu, tentavit id præstare. Primò quidem ex eo, quòd



illos, quos adducit in dicto Catalogo, faciat idem sensisse, tam cum Calvino, quàm cum Luthero, adeoque fuisse Luthero-Calvinistas, cum tamen nec ipse Lutherus, & Calvinus, nec ipsi Lutherani, & Calvinistæ inter se in doctrina Fidei conveniant; sicut ergo defacto nemo se fatetur esse Luthero-Calvinistam, sed vel Lutheranum, vel Calvinistam, ita neq; ab eo citati, poterunt dici Luthero-Calvinistæ. Non est autem major ratio, cur soli Calvinistæ trahant illos pro se, quàm soli Lutherani & è contra; imò eosdem æquali jure possent pro sua secta trahere etiam Anabaptistæ, & alij sectarij. Ergo exindè non potest deduci aliquem fuisse ante Lutherum, vel Calvinum, qui integrè ea omnia credidisset, tenuisset, aut docuisset, quæ tenuit, credidit, ac docuit Lutherus vel Calvinus, aut quæ tenent

Luthera-

Lutherani vel Calvinistæ. Secundò quia ex eo præcisè illos quos citat, facit Luthero-Calvinistas, quia invenit in illis unum aut alterū verbum, aut propositionem quam etiā Lutherani, & Calvinistæ tenent. Quod, si sufficeret, potuisset & Machometem, & Judam Iscariotem, & Arium ac alios Hæresiarchas ponere ad Catalogum Luthero-Calvinistarum. Nam & hi tenuerunt aliquid, quod tenent Lutherani & Calvinistæ. Sic Machometes tenebat dari solū unū Deum, Arius tenebat concilia Ecclesiæ errare posse, & Nicænum Concilium errasse ipso facto in sui condemnatione. Ergo sequeretur, quòd & Machometes, & Arius fuerint Luthero-Calvinistæ. Tertiò quia eos ponit in dicto Catalogo, quos constat, usque ad finem vitæ vixisse in Fide Romano-Catholica, aliquos etiam ex Pontificibus ipsis,

Car-

Cardinalibus, Archi-Episcopis, Episcopis. Monarchis, etiam talibus, qui scriptis suis, veritatem Catholicæ Fidei propugnare, sed quo fundamento? planè nullo. Nam S. Gregorium ex eo probat fuisse Luther-Calvinistam, quia coarguebat vitia Sacerdotum. Irenæum ex eo, quod scripturam Sacram collaudabat. Polycarpum ex eo, quod Apostolicam doctrinam tenuerit. Bellarminum ex eo, quod malos Catholicos de peccatis corripiebat. Ex quibus nullatenus sequitur hæc conclusio. Ergo fuerunt Luther-Calvinistæ. An non enim & moderni Romano-Catholici & Zelosi Concionatores, Sacerdotum malam vitam detestantur? malorum Catholicorum peccata exprobant? Scripturam Sacram ac doctrinam Apostolicam commendant, & tamen non sunt Luther-Calvinistæ.

CON-

CONSIDERATIO XXI.

**L**ongè melius itinerarium ego in hac mea deliberatione confeci, percurrendo Hæreses singulorum sæculorum à nato Christo. Inveni siquidem omnes ferè articulos Fidei, quos tenent Lutherani & Calvinistæ jam fuisse doctos ab alijs Hæresiarchis, & damnatos ab Ecclesia. Non quod aliquis fuisset, qui omnia illa docuisset, quæ docuit Lutherus, vel Calvinus, talis enim nullus omnino fuit, sed diversi diversos, ac diversis sæculis, & Temporibus. Indè tamen non potui concludere; quod Lutherana doctrina vel Calviniana fuerit ante Lutherum vel Calvinum. Sed feci hanc legitimam conclusionem. Ergo Lutherana, & Calviniana Religio est confarcinata ex varijs hæresibus jam pridem ab Ecclesia damnatis, nonnullis noviter adjectis



ctis, non secus ac vestis Mendicorum ex multis frustis, antiqui & diversi coloris panni, in Foro scrutario comparatis & collectis, superadditis aliquibus alijs frustillis ex novo panno, & colore, & qualitate prorsus improporcionado.

### CONSIDERATIO XXII.

Post hæc, assumpsi in considerationem, signa & notas veræ Christi Ecclesiæ: nempe quod si, *una, Sancta, Catholica, & Apostolica*; Et nullam ex his reperire potui in reformatis, seu potius deformatis istis Ecclesijs. *Non Unitatem*, cum in multis ijsq; præcipuis articulis Fidei, inter se discrepent, ac singulæ rursus in alias subdividantur de rebus Fidei sententias, & opiniones. *Non Sanctitatem*. Cum enim Sanctitas requirat, ut quis declinet à malo & faciat bonum Psal. 36. v. 26. Id certe

certè hæ Religiones non præstant, quæ non tantum non docent declinare à malo, Præcepta Dei servando sed tenent impossibile esse eadem servare; & non tantum non suadent bonum facere, sed docent bona opera ad salutem æternam prorsus esse inutilia, imò & peccaminosa, nec ullum Sanctum nominare possunt, qui fuisset illorū Fidei. *Non, quod sit Catholica, seu Universalis*, quia non annunciat in Universo Mundo, sicut Romana, ut Testatur S. Paulus ad Rom. 1. v. 4. nec quod fuerit semper, quia non fuit ante Annum 1517. Sed nec defacto est ubique; solum enim delitescit in pauculis provincijs Europæ, quæ ipsa est minima pars Orbis, respectu Africæ, Asiæ, & Americæ, in quibus de his Religionibus nihil penitus scitur, imò nec auditur. *Non quod sit Apostolica*, quia non est fundata ab Apostolis

stolis, nec pastorum suorum & doctrinæ suæ continuam successi-  
onem, possunt deducere usque ad  
Apostolos. Hæc autem omnia sig-  
na sunt in ecclesia Romano-Ca-  
tholica. Etgo Jure optimo, illam  
omnibus aliis prætuli.

CONSIDERATIO XXI.

**C**Onjeci deindè oculos ad initia  
conversionum populorum, na-  
tionum, & Regionum, ex Gentili-  
smo ad Fidem Christianam, quæ sa-  
nè mirabilis fuit, & non nisi Divina  
virtute, ope, auxilio fieri potuit,  
propter tot obstacula, tam potentis-  
simorum Regum, Imperatorum, &  
Tyrañorum, eorumque sævitiam,  
ac ipsorū Idololatrarum pertinaci-  
am, & obstinationem, præsertim  
cum Fides Christiana suaderet  
illis ea, quæ sunt carni, & san-  
guini, ac principiis Mundanis om-  
nino contraria, & proponeret My-  
steria

ria altissima, quæ solo naturali lu-  
mine nequeunt comprehendi, &  
quidem per prædicatores imbelles,  
ac incrimis. Investigavi dein, quā-  
nā fuerit illa Religio, ac Fides, & clarè  
deprehendi illam fuisse Romano-  
Catholicam & quidem per viros  
Apostolicos, à Romanis Pontifici-  
bus ad prædicandum Evangelium  
submissos. Nam quòd primis quin-  
que sæculis non fuerit alia Christia-  
na Religio, ad quam conversæ fuif-  
sent gentes, ipsimet adversarii non  
dissentur. Sexto verò sæculo con-  
versa est Anglia per S. Augustinum,  
Monachum missum eò à S. Grego-  
rio Papa. Septimo, Germaniæ per  
S. Bonifacium, missum à Gregorio  
III. Papa. Octavo Moravia per SS.  
Cyrillum & Methodium. Nono,  
Hungaria, & Polonia per S. Adal-  
bertū, & S. Piligrinū aliosque. De-  
cimo, Bohemia & Moschovia, Fran-



cia seu Gallia per S. Remigium, Frisia per S. Bonifacium & Villebrordum, longè adhuc prius. Undecimo, Pomerania per S. Brunonem. Duodecimo, Livonia per S. Mainardum. Et Svecia per Nicolaum Brakpier, postea in Pontificem Romanum electum. Pomerania per S. Othonem. H. s autem postremis duobus sæculis in Indijs Orientalibus, & Occidentalibus quàm plurimæ Provinciæ, & longè plures quàm tota Europa numerat, conversæ sunt ad Fidem Christianam, eamq; non aliam, quàm Romano-Catholicam, & in dies plures, ac plures ad eandem convertuntur. At verò nullam gentem ex paganis reperi conversam fuisse ad Lutheranam, vel Calvinianam, aut aliam ex novis moderni temporis sectam; sed solum ex tepidis Catholicis, idq; non alio ex fine, quam pro libertate carnis, & vi-

DE

tæ licentiosæ. Præstabat igitur mihi Romano-Catholicam Fidem potius, quàm aliquam ex reliquis moderni temporis sectis eligere.

#### CONSIDERATIO XXIV.

**E**X occasione hujus considerationis occurrit mihi alia observatio Nempe: Quod Deus omnes Apostolos, & viros Apostolicos, quos elegit, & misit ad conversionem populorum, ac gentium, ornaverit dono magnorum miraculorum juxta sua Divina præmissa, ut habetur Matt. 10. 1. 7. Euntes (ait Christus ad suos discipulos) *predicate, mortuos resuscitate, leprosos mundate, demones ejcite* &c. Et Marci ultimo: *Illi verò profecti predicaverunt ubique, Domino cooperante, & sermonem confirmante, sequentibus signis.* Antesignani autem modernarum novarum sectarum, esto glori-

C2

tur

tur, se missos à Deo tanquam Reformatores suæ Ecclesiæ; nullum unquam tamen signū, ac miraculum ediderunt in confirmationem suæ doctrinæ, vel suæ à Deo missionis: & quidem, ut quidam ait, nec unicum claudum equum, sanare potuerunt. Quomodo ergo poterā credere illos missos à Deo hunc in finem? præsertim cū Salvator noster nos præmonuerit, ut attendamus nobis à falsis prophetis, qui veniunt ad nos in vestimentis ovium (*scripturā & Evangelium semper in ore habentes*) intus autem sunt Lupi rapaces. Maxime verò, si ij contrariam sibi adinvicē doctrinam prædicent (ut fecit Lutherus, & Calvinus) Uterque enim veritatem docere non potuit, consequenter nec mitti à Deo uterq: ad reformandam Ecclesiam, neuter autem illorum majora argumenta aut signa protulit à Deo suæ missionis

nis & doctrinæ, quā alter. Igitur neutri judicabam esse credendum.

## CONSIDERATIO XXV.

**R**ursus consideravi varias, & mores Authorū harū Religionum, & feci comparationē eorum, cum ijs viris Apostolicis, qui Gentiles ad fidem Romano-Catholicā convertunt. Deus bonē quantam inter hos vidi disparitatem! tantam scilicet, quanta est inter cælum & terram. Hi namq; erant viri Deo uniti, devotioni ac pietati addicti, virtutibus magnis exornati, sobrij, humiles, continentēs, rerum Temporalium, & voluptatum carnis contemptores, solam Dei Gloriam querentes & Zelum animarū intendentes. Uti ex vitis illorum, & scriptis constat. Illi verò ventri, & carni dediti, è Fide Apostatæ, votifragi, impij, superbi, non aliud quā car.



carnis voluptates, & vitæ licentiam docentes, ut pariter ex illorū vitis, & scriptis clarissimè patet. Quid enim Luthero, & Calvino fuit superbius, & arrogantius? qui se toti antiquitati præferebant, suā interpretationem scripturæ Sacrae, interpretationi omnium SS. Patrum, & totius Ecclesiæ anteponebant. Cujus scripta magis spurca, quàm Lutheri? magis impia & blasphema quàm Calvinii? Ita ut jam & sequaces eorū, talium scriptorum pudeat.

## CONSIDERATIO XXVI.

**P**RO magno stimulo fuit mihi ad Fidem Romano-Catholicā præ alijs modernis Religionibus amplectendam etiam illud, quod in ea nunc quoq; reperiantur quàm plurimi, qui zelo animarum ducti, relictis, ac spretis omnibus vitæ hujus commodis, amicis & cognatis, di-

op. 2.

gnitatibus ac honoribus, & alijs mundi bonis, quæ in re vel spe habebāt, nō obstantibus minis Tyrānorum, & certissimā quasi nece à barbaris inferendæ, promptissimè & summa cum alacritate vadunt ad remotissimas etiam gentes pro illarum conversione, Evangelium Christi ijs prædicando, & ad Ecclesiam Catholicam eosdem adducendo, esto pro comperto habeant, se fore inter eas cum S. Paulo, *in laboribus plurimis, in carceribus abundantius, in plagis supra modum, in mortibus frequentè.* 2. ad Corinth. II. V. 12. Quod certò in Prædicantibus aliarum Religionum non reperi. Undè conclusi eos verè Spiritu Dei agi, non autem hos. *Majorem siquidem hac, dilectionem nemo habet, ut animam suam ponat quis pro amicis suis.* Joan. 15. V. 13.

C4

CON-

# CONSIDERATIO XXVII.

**O**bservavi & valdè admirabar etiā illud. Quomodo inter Romano-Catholicos multi divitijs affluentes, & amplissimas quoq; hereditates, ac omnes vitæ commoditates, etiam magnarum Familiarū, non tantum Nobilium, sed & Baronum, Comitū, Marchionū, Principum Filij ac Filiae speritis omnibus delicijs, ac voluptatibus ad pauperes, & austeros Religiosorum diversos ordines, spontè, & sæpè non nisi magnis obstaculis perruptis, tanto numero convolent. Præcisè solius Dei amore, & securitatis majoris salutis animæ suæ. ergo: cū in alijs novis Religionibus vix ullus magnæ Nobilitatis, vel conditionis valdè honestæ dignetur statū prædictiū amplecti. Quod non ideò dico quasi Deus esset acceptator personarum,

narū, cū constet Christum rudes, ac simplices piscatores in Apostolos elegisse, sed solum inde colligo, quod specialis Dei gratia in illis operari debeat, adeoq; & Fides illa esse vera, in qua tam singulares Gratiæ Deus suis confert.

# CONSIDERATIO XXVIII.

**M**Emini, cū adhuc esse Juvenis, duos Prædicantes Lutheranos me præsentem mentionē fecisse, adolescentis cujusdā bonæ Indolis mihiq; notissimi; Ac cū unus ex illis, hanc conjecturā de illo fecisset. Hic Adolescens vitā ducet cælibem, & continentē, quantū ex illius indole licet conjecturarie. Alter mox subjunxit: optimè sanè facit; continentia enim, & cœlibatus est magnū Dei Donū, & specialis gratia. Ego tunc adhuc planè Juvenis & quidē Lutheranus existens,

C 5 apud



apud me tacite hanc Illationē cum admiratione feci; Quomodo igitur fieri potest, ut cū nostri pastores dicant se reformatores Ecclesiæ, & Evangelij purissimi prædicatores, & continentia ac calibatus sit Donū Dei singulare, ac specialis gratia, Deus hoc donum & hanc gratiam nulli prædicantium conferat? prædicantes siquidē calibem vitam ducere nullibi est videre, quin nec audire quidem. Et vicissim quomodo Deus hoc donum, & hanc gratiam multis Papistis, quos nos Idololatrias esse dicimus, confert, apud quos tam multæ Virgines, Moniales, Religiosi, & Ecclesiastici, vitam continentem, & puram ducunt; debet igitur illorum Religio magis grata esse Deo, quàm nostra, quoniam aliter quis non potest esse continens, nisi Deus det ei donum hoc. Sæpius dein mihi in matu-

riori

riori ætate, hoc dictamen in memoriā recurrit, ac tandē etiā ad amplectendam Fidem Romano-Catholicam unum, ex motivis fuit.

### CONSIDERATIO XXIX.

**E**Volvi quam plurimos Authores, qui contra Fidem, ac Religionem Romano-Catholicam scripserunt, & illud signatē notavi, quod in omnibus suis argumentationib9 id probare affatim conentur, quod Catholici non negant, sed ultro admittunt: illud verò quod Catholici pro dogmate Fidei tenent, oppugnando vix attingant. Exempli gratiā: Adferunt copiosissimos scripturæ sacræ textus. Quod solus Deus sit adorandus, & colendus cultu Divino. Hoc autem Catholicorum nemo negat, qui firma Fide credūt peccatum Idololatriæ esse, creaturæ cuicunque tandem, cultum Divinum exhibere. Adducunt mul-

C6

ta scri-

ta scripturæ Testimonia quæ honorifice loquuntur de Matrimonio. Quid tum? hoc enim Catholici non improbant, imò Matrimonium inter Sacramenta numerant, hoc solum cum S. Paulo tenent. Quod qui matrimonio jungit Virginem suam, bene faciat & qui non jungit; melius faciat. Similiter merita Christi deprædicant, ipsiusque satisfactionem pro peccatis nostris. Quid inde? Hæc enim Catholici quoq; infiniti valoris esse docent, & satisfactionem illius sufficere pro totius mundi peccatis ajunt: Quid ergo docent? Id quod S. Petrus sua Epist. 1. v. 10. Sutagite, ut per bona opera, certam vestram vocationem, & electionem faciat. Et S. Paulus ad Rom. 8 v. 17. Si tamen compatimur, ut & glorificemur, pari modo Fidem mirè extollunt. Quid exinde? Etiam Catholici Fidem necessariam esse ad salu-

lutem fatentur. Quid ergo dicunt? Id, quod S. Jacobus cap. 2. v. 24. Ex operibus justificatur homo, & non ex fide tantum. Et quod S. Paulus ad Cor. 1. cap. v. 2. Si habuero omnem fidem, ita ut montes transferam, charitatem autem non habuero, nihil sum. Demum contra malam vitam aliquorum Sacerdotum invehuntur. Quid inde proficiunt? Hanc enim etiam omnes Catholici detestantur, sed & continentiam, ac puritatem Angelicam mentis, & corporis, in pluribus admirantur.

### CONSIDERATIO XXX.

IN iisdem Authoribus, uti etiam in aliorum prædicantium concionibus, & discursibus observavi; Quod calumnijs potius oppugnent, & coram plebe denigrent Ecclesiam Romanam Catholicam, & ex hoc modo agendi conjeci manifestè, quod deficiant in argumentis ad eandem oppugnan-



pugnandā. Quando enim deveni-  
tur in probationibus, & disputatio-  
nibus ad calumnias, infallibile si-  
gnū est, quod in probatione argu-  
mentās succumbat. Deindē calum-  
niæ semper sunt conjunctæ cū falsi-  
tatibus, & mendacijs. Quomodo er-  
go per ipsa mendacissima mendacia  
eruetur rei veritas? atqui hujusmo-  
di calumniæ sunt: V.G. Quod Ca-  
tholici ita adorent Sanctos, sicut  
ipsū Deū: Quod Pontificē habeant,  
pro Deo; quod in Sanctorū meritis,  
& suis proprijs ponant majorē spē,  
& fiduciā, quā in meritis Christi  
Domini, & sexcenta similia figmen-  
ta. Non potui igitur in mendacijs,  
& calumnijs fundamenta meæ fidei  
ponere, igitur statui mecū, quod  
ipsemet velim, rei veritatē inda-  
gare, quā compertā rejeci tamquā  
inpositorias, omnes has novas sectas

CON-

CONSIDERATIO XXXI.

**R**ecordor optimē, quod cū in  
adolescenciā mea interfuissem  
cuidam explicationi Theologicæ  
apud Calvinistas, quidā ex Audi-  
toribus, cæteris intelligentior  
proposuerit publicē professori, in  
persona Catholici quoddā argu-  
mentū valdē ponderosū. Quo audi-  
to Professor Calvinista substitit, &  
aliquantulum hæsit. Deindē verò  
dixit. Idem argumentū à se ali-  
quando cuidam suo Professori in  
Anglia fuisse propositū, sed ab eo  
pro responso se non aliud accepisse,  
quā quod argumentū illud sit  
planē insolubile, ac proinde Catho-  
licis ad illud directē nunquā esse  
respondendum, sed solū eluden-  
dū. Vehementer scandalizatus fui  
in hoc responso. Per elusiones enim,  
argumenta non solvuntur, nec ad  
cogno-

cognoscendā veritatē rei pervenitur. Et jam tunc judicabā, Acatholicos etiā circa articulos Fidei non laborare de rei veritate.

### CONSIDERATIO XXXII.

**I**llud quoque omnes Religiones à Romano-Catholica alienas, mihi suspectissimas de falsitate reddidit. quòd licet semper Catholicos ad scripturā provocent, ipsimet tamen Scripturā Sacrā pro libitu suo tractent, partim integros libros ex Canone Sacrorū Librorū eliminando: partim mala fide vertendo, partim pro suo arbitrio juxta dictamen uniuscujusq; privati Spiritūs interpretando. Cum tamen Romano Catholici eandē versionē omnes habeant, iisdē semper Biblijs omnes utantur, quibus usa est Ecclesia à mille & trecentis, ac amplius annis, neq; eam juxta suū propriū judici-

diciū explicant, sed sequūtur interpretationem veterū SS. Patrum ac totius Ecclesiæ, de qua Christus dixit Matth. 18.v.17. *Si quis Ecclesiam non audierit, sit tibi sicut Ethnicus, & Publicanus.*

### CONSIDERATIO XXXIII.

**U**T nihil intentatum relinquerē, legi consideratē parvulū Catechismū Lutheri, quo Lutherani in Hungaria defacto utuntur, eūq; contuli diligenter cum Catechismo ejusdem Lutheri Año 1567. Wittembergæ impresso, & reperi eundē in prima illa editione Wittembergēsi, differre toto cælo, in quā plurimis articulis Fidei. Nec satis capere potui tantā mutationē, nisi mihi occurrisset, quod Novatores moderni, pro libitu mutent Religionis suæ articulos, alios tenendo in una provincia, alios in altera, ali-

alios in uno seculo, alios altero. Quod si quis huic tantæ diversitati, quoad ipsos articulos Fidei inter hos duos Catechismos Fidem adhibere nolit, conferat simul utrumque, id autem facile consequi poterit, cum Wittembergensis ille Catechismus hoc ipso Anno 1701. sit Tyrnaviæ in Hungaria impressus. E contra verò cum peragrare diversas Provincias Catholicorū nullā in eorum Catechismis inveni, quo ad articulos Fidei discrepantiā, sed in omnibus omnino, omnimodam convenientiam.

#### CONSIDERATIO XXXIV.

Cum ergo viderē tantas diversitates opinionū etiam quoad Dogmata Fidei, inter eos, qui se Augustanā Confessionē profiteri dicunt, ipsam Confessionē Augustanā consideratē perlegere decrevi, sed

has

has tam diversas esse reperi, varijs in locis, & temporibus impressas, adeoque inter se differentes, ut quānā sit genuina Confessio Augustana, apud me determinare non potuerim, quia nec ipsi Professores Academicarum Lutheranicarum hac de re inter se cōveniebant, donec unā occasione Bibliothecā Cæsareā Viennensem vīstarē, in qua Bibliothecarius Cæsareus, inter alia exhibuit nobis, qui tunc simul eramus, illā ipsam in originali, quæ exhibitā fuit à Melanphone Augustæ in comitijs Imperialibus Carolo V. Cæsari Año 1530. Quæ in tantū differt ab alijs Editionibus Augustanæ Confessionis, ut nisi illis apponeretur Titulus *Augustana Confessionis*, nemo eas diceret esse Augustanas Confessiones. Unde intuli modernā Religionē Lutheranorū non esse Augustanæ Confessionis Religionē, sed longè



longè diversam, ideo hanc omninò  
reijciendā judicavi. Cur verò neq;  
illi originali acquieverim, inter ali-  
as rationes, hæc etiā fuit: Quod hæc  
ipsa contineat in se plurima men-  
dacia, & apertas contradictiones.  
Quas fusè deducit Cardinalis Paz-  
mañus in erudito suo opere, Kalauz  
dicto, à Fol: 415. usq; ad foliū 440.

CONSIDERATIO XXXV.

**C**onsideranti mihi sæpius verba  
illa Christi Domini: *intrate per  
angustam portam: quia lata porta, &  
spaciosa via est, qua ducit ad perditionem,  
& multi sunt, qui intrant per  
eam. Quàm angusta porta, & arcta  
via est, qua ducit ad vitam! Et pauci  
sunt qui inveniunt eam. Matt. 7. v. 13.*  
Item *Contendite intrare per angustam  
portam. Luc. 13. v. 24.* occurrit  
illico mihi Religiones alienas à  
Fide Romano-Cathol. ca non esse  
hanc

hanc arctam viam, quæ ducit ad vi-  
tam, sed illam spatiosam quæ ducit  
ad perditionē, nam juxta harū do-  
ctrinam, satis est ad vitam æternā  
consequendam, si credat quis se,  
salvandū, aut prædestinatū ad eam,  
quæ doctrina sanè contraria est illi,  
quā nobis præscripsit Christus per  
se, ac suos Apostolos. Nam interro-  
ganti illi Matth. 19. v. 16. Magister  
bone quid boni faciam, ut habeam  
vitam æternam? respondit Christus  
*Si vis ad vitam ingredi, serva man-  
data,* secundum verò doctrinam  
harū Religionum ad hanc interro-  
gationem non responderetur: si vis  
ad vitam ingredi, serva mandata; hoc  
enim ajunt esse impossibile. Quid  
autē responderetur à Novatoribus? si  
vis ad vitam ingredi, crede tantum  
quòd Christus pro te mandata Dei  
Patris adimpleverit. Similiter S. Pe-  
trus Act. 2. v. 37. interrogantibus  
Judæis

Judæis compunctis corde ex ijs,  
quæ ab eo audierunt. *Quid faciemus  
viri Fratres? Respondit Pœnitentiam  
agite, Et ipsemet Christus Luc. 13.  
v. 3. ait: nisi Pœnitentiam egeritis,  
omnes similiter peribitis. Et rursus S.  
Petrus Act. 3. v. 19. pœnitementi igitur,  
& convertimini, ut deleantur pec-  
cata vestra. Pariter & S. Joannes  
Baptista suam prædicationē sic in-  
choavit. Pœnitentiam igitur agite;  
Item facite fructus pœnitentiæ. Matt.  
3. v. 3. & 8. Quid autē hæc nova  
doctrina ad interrogationē: An, &  
quomodo pœnitentia sit agenda,  
respondēbit? hoc unicū: crede tan-  
tū, quod remissā sint tibi peccata  
propter merita Christi, & hoc solū  
sufficit. Quaro ulterius ex iisdem,  
An de eā dimittere debitoribus &  
condonare injurias mihi factas, si  
volo à Deo mihi remitti peccata?  
quid respondebunt? nō aliud juxta  
suam*

suā doctrinā, quā hoc non esse ne-  
cessariū, sed satis esse, si credā mihi  
dimissā esse peccata. Cum tamen  
Christus dicat Matt. 6 v. 14. & 15.  
*Si enim dimiseritis hominibus peccata  
eorum: dimittet & vobis Pater vester  
cœlestis delicta vestra: si autem non di-  
miseritis hominibus, nec Pater vester  
dimittet vobis peccata vestra.* Rursus  
pergo quærere, utrū per bona o-  
pera mereri possim vitam æternam?  
& respondebunt mihi negativè, &  
dicent solam Fidem ad id sufficere.  
Cum tamen scriptura dicat 2. Petri  
1. 10. *Satagite, ut per bona opera cer-  
tam vestram vocationem, & Electionem  
faciatis.* Et S. Paulus 1. ad Rom.  
2. v. 6. 10. *Et reddet unicuique se-  
cundum opera sua.* Et ad Cor. 3. v. 8.  
*Unusquisque propriam mercedem acci-  
piet secundum laborem suum.* Urgeo  
interrogando: possumne redime-  
re peccata mea Eleēmosynis? Cum  
Chri-

Christus dicat Luc. 11. v. 41. *Date Eleemosynam, & ecce omnia munda sunt vobis. Et Daniel. 4. v. 22. habetur: peccata tua Eleemosynis redime, & iniquitates tuas misericordijs pauperum. Et respondere debebunt consequenter mentiendo: Nec id esse necessarium, sed tantum crede, quod Christus pro te satisfecerit: & munda sunt tibi omnia: tantum crede Christum Dominum pro te esse mortuum, & redimes peccata tua. Sola Fides ad hæc omnia sufficit. Demum quaro, propter quæ peccata homines damnantur, & à celesti gloria excluduntur? Respondebit S. Paulus 1. ad Corinth. 6. v. 9. 10. *Nolite errare: neque fornicarij, neque idolis servientes, neque adulteri, neque molles, neque masculorum concubitores, neque fures, neque avari, neque ebriosi, neque maledici, neque rapaces, Regnum Dei possidebunt. Novatores autem**

autem respondebunt cum suo Luthero ( Postillâ in Dominicam 8. post Trinitatem ) *Sola in credulitas damnat. Ecce viam novam, eamque spatiosam ad cælum! sed quâ nemo pervenit ad illud,*

# CONSIDERATIO XXXVI.

**E**X consideratione hujus controversiæ, an sola Fides sufficiat ad salutem, pro qua adstruenda Lutherus ad illum textum S. Pauli ad Rom. 3. v. 28. *Arbitramur hominem justificari per Fidem, fraudulenter addidit per solam Fidem, venit mihi suspitio an non etiâ in alijs Textibus scripturæ Sacræ utantur similibus dolis A catholicis; & reperi id, quod suspicabar. Nam idem Lutherus in superius citatis verbis. 2. Petri c. 1. v. 10. Quapropter Fratres magis satagite, ut per bona opera certam vocationem vestram, & Electio-*

**D**

**nem**



nem faciatis, in sua versione totaliter omisit verba illa per bona opera. Quia apertè adversantur ejus errori, quò docet bona opera homini non conducere ad salutem. Calvinistæ pariter plerique in Evangelio Lucae cap. 22. v. 19. verba illa clarissima: Hoc est Corpus meum sic transmutarunt: Hic est Corpus meum, ut excluderent realem præsentiam corporis Christi in Eucharistia. Ob eandem causam, ubi Joan. 6. v. 51. legitur. Ego sum panis vivus qui de cælo descendendi: pro voce vivus, substituerunt vivificans: ut intelligatur panis usualis. Et in Epist. S. Jacobi 5. v. 16. verba illa Confitemini alterutrum peccata vestra. Reformatores sic vertunt: Confitemini peccata vestra erga invicem, ut sic eludant Sacramentalem Confessionem, quam inde probant Romano-Catholici. Et illud S. Pauli ad Hebræos 13. v. 4.

Hono-

Honorabile connubium in omnibus, Novatores ut defenderent Matrimonium etiam Sacerdotum, vertunt sic: Honorabile connubium inter omnes: Item Ex verbis illis Christi Domini Matth. 25. v. 34. 35. Venite benedicti Patris mei, possidete paratum vobis regnum à Constitutione mundi. Esurivi enim, & dedistis mihi manducare: Sitivi, & dedistis mihi bibere: Hospes eram, & collegistis me. Illud enim omisit Lutherus in sua versione, quia videbat inde probari, opera bona esse meritoria vitæ æternæ. Omitto quàm plurima alia his similia. Unde conclusi harum Religionum antesignanos viam Dei in veritate non docere, sed scripturas malâ fide ad suum sensum contorquere, & pro suo libitu truncare ac mutare. Quomodo igitur prudenter poteram illorû Religionis nomen dare?

D2

CON-

CONSIDERATIO XXXVII.

**I**NSITUI deīn Analyſim & Syntheſim circa diſcernendā verā Chriſti Eccleſiam à non veris, hāc ratione: In Chriſtianitate datur aliqua vera Chriſti Eccleſia (quam propoſitionem admittunt omnes omnino Religiones- & Sectæ, quæ ſunt in Chriſtianitate, præter hæreticos illos, qui vocantur *Expectantes*) ſi datur Chriſti Eccleſia, Ergo hæc debebat inſitui ab ipſo Chriſto; ſi ab ipſo Chriſto utique inſitui debuit ſapienter: ipſe liquidem fuit ſapientia æterna. Et cum ſapienter ſit inſtituta, debebat inſitui durans ſtabiliter, juxta ipſius Chriſti doctrinā: Matth. 7. v. 24. ut ait: *Sapientem virum eſſe, qui ædificat domum ſuam ſupra petram, & deſcendat pluvia, & venerunt flumina, & flaverunt venti, & irruerunt in domum illam,*

¶

*& non cecidit: fundata enim erat ſupra petram.* Eſtque illa de qua Chriſtus dixit: Matth. 16. v. 18. *Supra hanc petram ædificabo Eccleſiam meam, & porta inferi non prævalebunt adverſus eam; Si ita ſtabiliter eſt fundata. Ergo non potuit deficere & cadere, ſive per pluvias afflictionum, ſive per flumina, & fluvios perſecutionum, ſive per ventos hæreſum, aliàs enim fuiſſet fundata ſupra arenam, & non ſupra Petram. Si non potuit deficere, ergo fuit ſemper viſibilis. Et aliunde Chriſtus fruſtra fideles ſuos monuiſſet Matth. 18. v. 17. *Dic Eccleſia, ſi autem Eccleſiam non audierit; ſit tibi ſicut Ethnicus, & Publicanus.* Quomodo enim poſſent aliquid dicere, ſeu proponere fideles Eccleſiæ inviſibili, & irreperibili? Si fuit viſibilis omnibus fidelibus, Ergo debuit propagari per Apoſtolos, poſt Aſcenſionem*

D 3

nem

nem Christi, utpotè quibus dictum est à Christo: *Euntes in univsum mundum predicare Evangelium omni creatura.* Mar: 16. v. 15. Quod etiam fideliter ij præstiterunt testante eodem Evangelistâ v. 20. *Illi autem profecti, prædicarunt ubiq; Domino cooperante, & sermonem confirmante, sequentibus signis, & cum Fides per Apostolos ubiq; fuit propagata, & per univsum mundum veritas illius prædicata, Igitur fuit Universalis seu Catholica.* Si universalis, ergo & una. Et ideò Joan: 10. v. 16. dicitur *unum ovile*, ad Rom: 12. v. 4. *unum corpus.* Ad Eph. 4. v. 4. *unus Spiritus.* Si unum corpus, & unus Spiritus est Ecclesia, Ergo debuit habere etiam unum caput. Si hoc, Ergo pro capite visibili post Christi ascensionem, Ecclesiæ hujus debuit à Christo cōstitui unus ex Apostolis. Si unus ex Apostolis. Ergo ille, cui

Chri-

Christus dixit: *Pasce oves meas: pasce agnos meos:* Joan. ult. v. 16. Item tu vocaberis Cephass, id est Petrus. Et super hanc petram adificabo Ecclesiam meam: & tibi dabo claves Regni Cælorum. Matt. 16. v. 28. Ergo Petrus constitutus erat caput visibile Ecclesiæ à Christo fundatæ. Rursus quia Petrus non potuit semper vivere, & Ecclesia duratura erat semper juxta illâ promissionem Christi Matt. 28. v. 20. *Ecce ego vobiscum sum omnibus diebus, usq; ad consummationem sæculi,* debuit habere in officio suo pastorali, eoque universali, in doctrina Christiana alios successores, & hi rursus alios: Ergo successio hæc perpetua & continuata pastorum & doctrinæ, est de ratione veræ Christi Ecclesiæ. Quia verò Petrus & alii ejusdem successores, non poterant prædicare Evangelium in universo mundo in tua personâ,

D4

de-



debebant habere coadjutores in hoc sacro opere. Ideò Christus ipse, dedit quosdam (alios quoq;) Pastores & Doctores ad consummationem Sanctorum, in opus Ministerii, in adificationem corporis Christi, donec occurramus omnes in unitatem Fidei, & agnitionis Filii Dei, in virum perfectum, in mensuram atatis, plenitudinis Christi (nēpe in resurrectione) ut jam non simus parvuli fluctuantes, & circumferamur omni vento doctrinae, in nequitia hominum, in astutia ad circumventionem erroris Ad Eph. 4. v. 11. 12. Demum quia Christus vocavit nos ad Ecclesiam suam ut induamus novum hominem, qui secundum Deum creatus est, in Justitia & Sanctitate veritatis. Ibidem v. 24. Ecclesia Christi debet esse Sancta, hoc est, & ad Sanctitatem suā doctrinā instruere, & saltē aliquas Personas Sanctitate Illustres in suo gremio continere. Atqui

hæc

hæc Christi Ecclesia ab ipso fundata, & per Apostolos propagata, non est alia, quàm Romano-Catholica. Hæc enim per SS. Apostolos, Petrū & Paulum, Romæ est inchoata & aucta, hujus Fides erat eadem, quæ fuit Apostolorum & nominatim S. Pauli, qui ad Romanos 1. v. 12. Fidem Romanam dicit esse Fidem suam, & Fidem suam esse Fidem Romanam: Ergo est Apostolica. Hæc, teste eodem Apostolo eodem capite v. 8. annunciata fuit in universo mundo. Ergo est Universalis seu Catholica. Hæc est fundata à Christo per Petrum in Petra. Ergo non potuit deficere. Fuit semper & est, visibilis, ad quam recurrebant omnes gentes, & ad illam convertebatur ex Gentilismo omnes populi. Hæc habuit semper per continuam successionem Pastores totius Christianitatis à S. Petro inchoando,

De

usq;

usq; ad modernum Pontificem Clementem XII. Hæc tenet eandem omnino doctrinam Fidei per universum orbem. Ergo est una. Hæc habuit innumeros Sanctos, & Sanctas, Martyres, Confessores, Virgines, & docet fideles suos ad sectandam Sanctitatem declinando à malo & faciendo bonum. Ergo est *Sancta*. ergo & vera Fides, vera Religio, vera Christi Ecclesia; Si vera, ergo sola, Ergo hæc sola est amplectenda,

### CONSIDERATIO XXXVIII.

**V**icissim aliæ omnes Religiones à Romano-Catholica alienæ sive simul & collectivè, sive singulativè sumptæ in doctrina sua, & dogmatibus Fidei plurimum differunt inter se. Ergo non sunt *una Ecclesia*. Non sunt propagatæ per Apostolos, sed multis sæculis post tēpora Apostolorum exortæ. Ergo non sunt *Eccle-*

*Ecclesia Apostolica*. Non sunt universales, nec sunt ubique, sed in pauculis duntaxat Provinciis & quidem solius Europæ. Ergo non faciunt *Ecclesiam Catholicam* seu universalem; Suorum Pastorum, & doctrinæ successionem non possunt altius referre, quàm ad Lutherum. Ergo non habent continuam successionem pastorum & doctrinæ, ab ipsis Apostolis. Nullum Sanctum suæ Religionis possunt nominare, nec docent à malo declinare, vel bonum facere, imo tenent, illud esse impossibile, & hoc inutile. Ergo non constituunt *Ecclesiam Sanctam*. Ergo nullum habent indicium veræ Christi Ecclesiæ. Ergo omnes & singulæ sunt rejciendæ.

### CONSIDERATIO XXXIX.

**C**ontingit frequentissimè, ut inter Romano-Catholicos & Aca-

tholicos, in aliqua controversia, non sit questio, circa Textū aliquē scripturæ Sacræ, an ille liber scripturæ, ex quo is profertur, sit liber Canonicus? nec an sit bona, & legitima versio; sed præcisè quis sit illius sensus genuinus, & legitima interpretatio? Romano-Catholici, interpretantur eum juxta mentē primitivæ Ecclesiæ & veterū Sanctorū Patrum: circa eundem A catholici cōmīniscuntur novas interpretationes, easque non solum à primitivæ Ecclesiæ, & veterum Sanctorum Patrum interpretatione diversas, sed etiam inter se discrepantes, & oppositas, prout unicuique privatus suus Spiritus dictaverit. In similibus casibus sæpius anceps hæsi, cuinam explicationi & interpretationi adhærere debeā! Sed re diligenter consideratā, ratio ipsa mihi clarissimè dictabat potius esse sequendam interpretationem

Roma-

Romano-Catholicorū, ut potè conformiorem interpretationi antiquissimæ totius Ecclesiæ, & veterū Sanctorum Patrum. Tum quia auctoritas communis, & totius, ac antiquissimæ Ecclesiæ, prævalet unicuique privatæ auctoritati, eaque novissimæ, valdè suspectæ: Tum quia veteres Sancti Patres omni exceptione majores erant, in Sanctitate, & doctrinæ soliditate, in virtutibus, & veritatis indagatione, modernis novellis, leviculis, sciolis, nihil aliud quàm vitæ libertatē & carnis licentiā quærentibus & sectantibus, Ecclesiæ deformatoribus. Tum quia illi erant viciniōres temporibus Apostolorū, & nonnulli ferè ipsdem, aut saltē immediatis eorū successoribus convixerunt, ac proinde de eorum sensu ac mente, majorem poterunt habere notitiā, circa Scripturæ Sacræ intelligentiam, quàm

D7

moder-



moderni Novatores post tam multas annorum centurias; Tum quia eorum interpretatio fuit ante motas controversias inter Catholicos & A catholicos hodiernos, adeoq; sine ullo privato affectu sacras literas interpretabantur; at verò moderni heterodoxi præoccupato affectu in alterutram partem controversiæ, conantur scripturas ad suum sensum & doctrinam trahere, vel rectius detorquere, & non doctrinam suam scripturæ Sacræ accommodare.

CONSIDERATI XL.

**S**ed ut hæc res magis pateat, declaremus eam in exemplo: statuitur ex.g. hic Textus Scripturæ Sacræ, & hæc verba Christi Domini: *Hoc est Corpus meum.* Romano-Catholici accipiunt verba hæc in proprio ac reali sensu, quia hæc fuit explicatio, illorum, & interpretatio, semper  
totius

totius Ecclesiæ ab initio ejusdem, ac omnium veterū Sanctorū Patrum. A catholici id negant, ex suo proprio sensu, & privati Spiritūs dictamine. Et rursus alio modo eandem explicant Lutherani, alio Calvinistæ, alio Zvingliani, alio Ariani, & unusquisq; pro argumento suæ interpretationis, nihil aliud adducit, quàm privati sui Spiritūs dictamen. Cui igitur potius ex his spiritibus potuissent credere, aut cujus interpretationi potius adhærere; melius proindè fore judicavi nulli eorum credere, cum pro una parte majorè rationē veritatis adferri non viderem, quàm pro altera. Veritas enim una est, quacunq; de re; falsitas verò multiplex. Malui itaq; hoc in puncto etiam, sequi doctrinam Fidei Catholicæ, utpotè securiorem.

CON-

## CONSIDERATIO XLI.

**U**T ad fundamentū veritatis indagatæ devenirem. statui mecum utriusq; partis celebriores Authores evolvere, hac intentione, ut viderem quomodo eorum doctrina, cum doctrina veterum SS. Patrum primitivæ Ecclesiæ ac ipsorum & inter se conveniret. Legi proindè varios libros eosque copiosos à Romano-Catholicis, & quidem diversarum nationum, in diversis Regnis, ac Provincijs conscriptos, partim à Hispanis, Italis & Gallis, partim à Belgis & Anglis, partim à Germanis, Polonis & Hungaris, & deprehendi omnes in dogmatibus Fidei, tam cum veteribus SS. Patribus, quàm inter se per omnia convenire, & quod mirum mihi videbatur, illos etiam, qui in alijs scholasticis materijs acriter inter se disceptant, ut

sunt

sunt Scholæ Thomistarum, Scotistarum, Nominalium, & Societatis Jesu, qui tamen ubi ad dogma aliquod Fidei ventū fuerit, idē omnino tenent, idē docent, idē profitentur. Id ipsum observavi in scriptis veterum SS. Patrum. Licet ij diversis temporibus & remotissimis in partibus vixerint, ac scripserint; Ut Ignatius & Chrysostomus Antiochiæ, Athanasius & Telephorus Alexandriæ, Macarius & Cyrillus Hierosolymæ, Proclus Constantino-  
poli, Gregorius & Basilus in Cappadocia, Justinus Athenis, Dionysius Corinthi, Ephrem in Syria, Cyprianus, Optatus & Augustinus in Africa, Epiphanius in Cipro, Ambrosius in Italia, Irenæus in Gallia, Orosius & Isidorus in Hispania, Beda, in Anglia. E contra verò cum contulissim Acatholicorum moderatorum scripta, cum doctrina vete-

rum

rum Sanctorum Patrum, in tantum eos ab illa recessisse comperi, ut toto coelo ab eadem distent: Combinavi dein ipsos scriptores A catholicos inter se, & maximam discrepantiam in dogmatibus Fidei inter illos, clarissime deprehendi: dum non tantum Calvinistæ in Lutheranos, & vicissim Lutherani in Calvinistas, ac utrique in Puritanos, Arianos, & Anabaptistas insurgunt, sed etiam illi, qui sub eodem Titulo comprehenduntur, mirum in modum inter se digladiantur, quo ad Fidei suæ Dogmata. Et aliud sentiunt, tenent, ac docent, circa eadem, rigidi Calvinistæ, aliud molles Calvinistæ, aliud Remonstratenses, aliud contra Remonstratenses, aliud Puritani, aliud Presbyteriani. Et aliud Lutherani Wittembergenses, aliud Regiomontani, aliud in Svecia, aliud in Hungaria, aliud in statu Brande-

bur-

burgico, aliud in Anglia: Aliud idem tenent hoc sæculo, aliud tenuerunt priori sæculo, aliud ad initium Lutheranismi, aliud in ejusdē progressu. Quam igitur causam adferre potuissem, in extremo die Judicij, si tot ac tantis hominibus Ecclesiæ, tenebricosos homulos, pauculos minus doctos, minus probos, ac hos inter se divisos, antetulissem? Potius igitur illis adharendum, & hos rejciendos judicavi.

## CONSIDERATIO XLII.

**S**ed licet hi omnes tacuissent, ipsi tamen lapides & res cunctæ vultustatem aliquam habentes, mihi loquebantur, & veritatem Fidei Romano-Catholicæ inclamabant & inculcabant. Consideravi enim templa antiquissima, Electiones Caesarum & Regum, eorumq; inaugurationis ritum, veterum Caesarum ac Regum



Regum statuta & Articulos, antiquissimarum Academi-  
arum Christianarum consuetudines ac Leges :  
Nationum ac Populorum ad Chri-  
stianitatem conversiones, marmo-  
ribus incisas inscriptiones, omnium  
sæculorum à Christo Nato Histori-  
cos & Annales, gesta & res memo-  
rabiles omnium temporum, à quibus  
cœpit promulgari Christiana Fides;  
Ephemerides & in ijs Festa Sancto-  
rum & denominationes solemnio-  
rum dierum, per annum, quæ eti-  
am apud ipsos A catholicos in usu  
sunt, cujusmodi sunt : Dominicæ,  
Quadragesimæ, Quinquagesimæ,  
Sexagesimæ, Septuagesimæ, Domi-  
nica in Albis Quasimodogeniti,  
Jubilate, Cantate, Rogate &c. Quæ  
omnia mihi in clamabant non aliam  
unquam Religionem in Christiani-  
tate imis radicibus insedis-  
se, quam Romano-Catholicam : Convincen-

tem

tem proinde habui rationem, cum  
vetustati adhererem & nuper natas  
novitates rejicerem.

### CONSIDERATIO XLIII.

**S**eptemdecim jam sæcula præte-  
riore quibus Ecclesia RomanoCa-  
tholica impugnata fuit à crudelissi-  
mis Tyrannis, à Mahometanis, à  
Paganis & Gentilibus, à Schismaticis,  
à tam diversis hæresibus, sem-  
per tamen mansit, & nunc quoq;  
manet invicta, insuperabilis, visi-  
bilis & florens, quin in dies magis &  
magis augetur, crescit, & propaga-  
tur. E contra verò tot, ac tam variæ  
exortæ fuerunt hæreses, quæ qui-  
dem videbantur potentissimæ, &  
diffundebantur instar torrentis, o-  
mnes tamen sensim sine sensu inte-  
riore & perire, ac penitus defecere.  
Tales ex g. hæreses fuere; Mani-  
chæorum, Donatistarum, Pelagia-  
norum

uorum, Iconoclastarum & aliarum  
quàm plurimarum, Quid inde conclusi?  
Non aliud quàm quòd Ecclesia Ro-  
mano-Catholica fundata sit à Chri-  
sto in petra, & de qua Christus præ-  
dixit: Quod neque portæ inferi præ-  
valebunt adversus eam: aliarum verò  
sectarum ædificatarum fuerint ab homini-  
bus & in arena, & descendit pluvia,  
& venerunt flumina, & flaverunt  
venti, & irruerunt in illas & cecid-  
erunt, & fuit ruina illarum magna;  
imò & per se corruerunt multæ, &  
modernarum quoque successu temporis  
corruent. Juxta illud dictum Salva-  
toris: *Omnis plantatio quam non  
plantavit Pater meus Cælestis, eradi-  
cabitur.* Malui igitur me recipere in  
illam domum, quæ fundata est in  
Petra, quàm in aliquam illarum quæ  
ædificatarum sunt super arenam, & pro-  
ximam minantur ruinam.

CON-

# CONSIDERATIO XLIV.

Sæpius perlustravi ex professo Bi-  
bliothecas tam Catholicas quàm  
Acatholicas, & in Catholicis obser-  
vavi tria genera, seu classes libro-  
rum per longissimas series disposito-  
rum, ex quibus in Bibliothecis Aca-  
tholicis, inter libros ab ipsis con-  
scriptos, nec vestigium quidem ex-  
stabat. Quarum trium classium in  
Bibliothecis Catholicis. Prima erat  
sub Titulo *Vite Sanctorum & San-  
ctarum.* Plurimarum hæ erant, ex omni  
statu Fidelium. Erant inter eas *Vitæ*  
*Sanctarum Virginum innumerarum.*  
*Sanctarum item Viduarum, Episco-  
porum, Eremitarum, Religiosorum,*  
*Monialium, Martyrum, Viro-  
rum Apostolicorum. SS. Regum &*  
*aliorum Sanctorum Confessorum,*  
*in quibus continebantur admiran-  
dæ eorum ac heroicæ virtutes, vitæ*  
*inno-*

innocentia, morum Sanctitas, devotio erga Deum, charitas erga proximum, ac omnis vitæ Christianæ perfectiones. Et recogitabam ac apud me concludebam, illam Religionem indubitatè veram esse, in qua fuere hæ Sanctæ personæ, tantarum virtutum, ac tantæ perfectionis. Non potest siquidem mala arbor bonos fructus facere Matth. 7. v. 18. & v. 20 Et ex fructibus eorum cognoscetis eos. Atque assummebam. Atqui hæ omnes Sanctæ personæ vixerunt & mortuæ sunt in Fide Romano-Catholica. Undè necessariò inferre debui. Ergo Fides Romano-Catholica est vera.

Altera autem classis librorum erat sub Titulo *Libri Ascetici*, in quibus comprehendebantur saluberrimæ spirituales doctrinæ, de exercitio virtutum Christianarum, & perfectione vitæ, de Imitatione Christi.

Christi, de mundi contemptu & vanitate, de amore Dei & charitate proximi, de dilectione inimicorum & condonatione injuriarum, de humilitate profunda, de castitate intaminata, & mentis ac corporis angelica puritate, de conformitate humanæ voluntatis cum Divina, de meditatione quatuor Novissimorū, & peccatorum gravitate, deque praxi omnigenæ pietatis, ac devotionis.

Tertia classis erat sub Titulo *Morales Theologi*, qui fusè tractant de observatione decalogi, & Legum Divinarum, de restitutione rerum alienarum & iniquè possessarum, & refusione damnorum per nos alteri causatorum, de Sacramentorum usu & administratione debita, de quælibet rebus ad dirigendam conscientiam spectantibus.

In Bibliothecis verò A catholicis, E nullos



nullos similes libros reperire potui ;  
 Non vitas *Sanctorum & Sanctarum*,  
 quia nullos Sanctos vel Sanctas ha-  
 bent. Non *Libros Asceticos*. Nihil  
 enim libri eorum habent de perfe-  
 ctione, quam neq; ex nomine nove-  
 runt. nihil de Imitatione Christi,  
 quam dicunt esse impossibilem, ni-  
 hil de exercitio virtutū, & bonorū  
 operum, quæ inutilia esse ad vitam  
 æternā judicant, nihil de castitate  
 & continentia ad cujus vel nomen  
 exhorrescunt, nihil de poenitentia  
 agenda, ad quam ajunt sufficere, si-  
 quis credat Christum pro peccatis  
 nostris æterno Patri satisfecisse :  
 Theologia Moralis apud illos nulla  
 est. Utpotè qui docent Præcepta  
 Decalogi servari non posse : pecca-  
 ta omnia esse æqualia : peccata præ-  
 destinatorum apud Deum non repu-  
 tari pro peccatis : neminem damna-  
 ri nisi ob peccatum infidelitatis. Et  
 alia

alia his similia, quæ Caro & Sangvis  
 illis suggerit, & non Pater cœlestis  
 ipsdem revelavit, suntque non vitæ  
 spiritualis, sed brutalis & animalis  
 principia, omnis laxitatis, & licen-  
 tiosæ vitæ, ac libertatis carnis, occa-  
 sionem præbentia.

#### CONSIDERATIO XLV.

Contuli etiam conventicula Aca-  
 tholicorum & specialiter illa in  
 quibus cussæ sunt confessiones : Au-  
 gustana, Helvetica, Genevensis,  
 Anglicana, cum antiquissimis &  
 Generalibus Concilijs Ecclesiæ Ro-  
 mano-Catholicæ, sed quæ poterat  
 esse comparatio inter Lucem & te-  
 nebras? ad Concilia, siquidem Ge-  
 neralia Ecclesiæ Romano-Catholi-  
 cæ, convocari solent Episcopi toti-  
 us orbis, summi ex omnibus natio-  
 nibus Theologi, Legati & Oratores,  
 Regum & Cæsarum, tractantur ne-  
 goria

gotia summa cum maturitate, accuratissima cum discussione, cum consideratissima deliberatione, ac controversiarum unanimi definitione & decisione, & decretorum à Fidelibus universali acceptatione; celebrantur longissimo tempore, ac subinde annis & annis, ut res controversæ melius discutiantur, ventilentur, examinentur, ac semel definitæ non amplius in dubium revocentur. Quid autem conventicula A catholicorum? Accipiamus in Exemplum, conventiculum Augustanum in quo cusa est confessio Augustana? Hæc confecta est paucorum, vix Theologiâ tinctorum consilio; & scripta est cum magna festinatione, & celeritate, & quidē in diversorio publico, interfuere illi solum unius nationis, Germanicæ scilicet viri, ijque pauculi, præoccupati jam prius alijs opinionibus, homines animi elati, carnis li-

berta-

bertati, & vitæ licentiosæ addicti, eadē à pauculis civitatibus & Principibus est acceptata, à pluribus rejecta, sæpius mutata & vitata. His utrinque consideratis, quomodo potui non stare eorum potius, quam horum iudicio, in decisione rerum controversarum Fidei?

# CONSIDERATIO XLVI.

Considerationem hanc, feci circa conscientias; Catholicā & A catholicam; Est autē conscientia actus intellectus seu rationis, qui dicat nobis vel advertit, aliquid licitum vel illicitum esse, adeoque agendum vel omittendum, estque proxima & immediata voluntatis nostræ Regula. Jam videamus quænam sint hæ Regule dirigentes voluntates, ex doctrina Romano-Catholicorum, & ex doctrina A catholicorum.

Ex doctrina Romano-Catholi-

E 3

corum

corum, sunt hæc: Omne peccatum est cavendum, & in libero arbitrio est hominis adjuvante Dei Gratia, ut peccet vel non peccet.

Omne peccatum mortale, meretur poenam æternam, & unum illorum sufficit ad æternam damnationem.

Peccatum pro nulla re hujus mundi est faciendum, ita, ut præstet millies mori, quàm unicum peccatū committere etiam minimum.

De omni peccato etiam levissimo, ac verbo otioso danda est Deo ratio.

Non dimittitur peccatum, nisi restituatur ablatum.

Post grave peccatum commissum nihil restat, quàm vel Infernus vel poenitentia.

Nullum opus honestum super naturale est, quod non meretur Gloriam & gratiam supernaturalem aut illius augmentum.

Omnia

Omnia peccata mortalia; sunt in Confessione aperienda, ac Sacerdoti manifestanda, & plura his similia.

Acatholica autem doctrinæ, hæc sunt conscientia dictamina.

Præcepta DEI est impossibile servare.

Unusquisque tenetur se credere salvandum vel prædestinatum.

Talibus qui hæc credunt, DEUS non imputat ullum peccatum.

Propter nullum peccatum damnatur homo, nisi propter peccatum infidelitatis.

Bona opera non sunt meritoria vitæ æternæ.

Poenitentia pro nostris peccatis non est necessario agenda, siquidem Christus jam sua morte & sanguine satisfecit pro nobis.

Non est in nostra potestate peccata cavere.

E4

Nemo



Nemo obligatur ad sua peccata confitenda : Sola fides sufficit ad salutem.

Jam quis consideret & perpendat, his principijs, qualisnam conscientia formabitur ad evitandum malum & faciendum bonum? Cum tamen principia Catholicæ doctrinæ id unicum præstare conentur, & præstare possint. Convictus proinde sui potiùs conscientiam Catholicam sequi, quàm Acatholicam.

# CONSIDERATIO XLVII.

**V**ehementer & illud mihi displicuit in Prædicantibus, quòd in omnibus suis concionibus ac sermonibus, totos quantos se occupent in carpendis Catholicis & præsertim in Cæremonijs & ritibus eorum irridendis, interim tamen quæ sunt gravissima in sua Religione, & unicè necessaria ad salutem populi curandam,

dam, ea penitus dissimulent, cujusmodi sunt : Quòd ipsi non sint veri Sacerdotes utpotè non habentes potestatem conficiendi Corpus & Sanguinem Christi in Eucharistia: neq; potestatem dimittendi peccata, in quibus tamen Sacerdotalis muneris officium consistit. Undè fit ut graviter decipiatur populus, putans se sub utraq; specie accipere Corpus & Sanguinem Christi; sic à Prædicantibus dementatus, cum tamen sub neutra specie accipiat, defectu Sacerdotalis potestatis in Prædicantibus, sed purissimum panem, & purissimum vinum. Persvadent item populo se nihil docere, nisi quod docuit, & tenuit primitiva Ecclesia Christiana, & Veteres SS. Patres, quod tamen falsissimum est, & ipsi met conscij sunt hujus falsitatis; Non docent suos aut peccata cavere, aut pro commissis peccatis poenitentiam,

tentiam agere; Non hortantur eos-  
dē ad benē agendum, benē & Chri-  
stianē vivendum, conformiter ad  
doctrinam & Exemplum Salvatoris  
nostri.

### CONSIDERATIO XLVIII.

**C**ūm versarer inter Catholicos,  
observabam quinam illorum Ju-  
dicio, censeretur malus, ac tepidus  
Catholicus, & intellexi illos in hac  
Classe ab ijs poni: Qui Dei & Ec-  
clesiæ præcepta non observant, in  
bonis operibus se non exercent Con-  
fessionē fugiunt, & negligunt, rarō  
Sacris interfunt, ad Sacramentum  
pœnitentiæ rarō accedunt, concupis-  
centijs suis, & sensibus indulgent,  
jejunia non observant &c. Et reflec-  
xi me ad A catholicos, inter quos,  
qui hæc non observant, pro ferven-  
tibus Evangelicis & Protestantibus  
habentur. Et subintuli, ergo infimi

&

& pessimi Catholici, sunt sicut opti-  
mi Evangelici vel Protestantes. Et  
confirmatus fui in illa gradatione  
quam aliquando audiverā: Ex pes-  
simo Catholico fit optimus Luthe-  
ranus, ex pessimo Lutherano, opti-  
mus Calvinista, ex pessimo Calvinis-  
ta optimus Arianus, ex pessimo  
Ariano, optimus Machometanus.

### CONSIDERATIO XLIX.

**P**RO motivo conversionis ad Fi-  
dem Romano-Catholicam, eti-  
am illud mihi erat: Quod nunquam  
observaverim, ideo deficere à Fide  
Romano-Catholica aliquē ad Aca-  
tholicos; ut melior fiat, sed præ-  
cisē ut libertatem carnis, ac licen-  
tiam vitæ consequatur. Undē nul-  
lum Religiosum, aut Ecclesiasticum  
vidi à Catholicis ad A catholicos  
transire, cujus prima cura non fu-  
isset ducendi uxorem: & voluptates

E 6

car-

*carnis sequi.* E contra verò qui ex A catholicis convertuntur ad Fidem Romano-Catholicā observavi evassisse in homines valdè pios & ferventes, Zelosos ac Exemplares, & multos ex ijs mundo valedixisse, & se totos quantos Deo, ac illius servitijs consecrassè. Atque sic omnis Arbor bona, bonos fructus facit, mala autem arbor, malos fructus facit Matth. 7. v. 17.

Sed & illud mihi mirum videbatur. Quòd cum tam clari Scripturæ Sacre Textus, sint de necessitate & utilitate Charitatis, Spei, Timoris Dei, Eleëmofynæ & aliorum bonorū operū, ac de necessitate Fidei, A catholici tamen doceant solam Fidem sufficere ad salutem, licet hoc nullibi sit in Scriprura Sacra. Sicut enim de Fide testatur Scriptura : *Credidit Abraham Deo, & reputatum est illi ad Justitiam.* Item *Fides tua*

*te sal-*

*te saluum fecit.* Idem etiam de Spe testatur eadem Scriptura: *Multa flagella peccatoris, sperantem autem misericordia circumdabit.* Psal. 13. v. 10. Item : *In te sperabo non confundar in æternum.* Item *Spes autem non confundit.* Item *Omnis qui habet spem in eo, sanctificat se.* 1. Joan. 3. v. 3. Et de Charitate Remittuntur ei peccata multa, quoniam dilexit multum. Luc. 7. v. 42. Et Charitas cooperit multitudinem peccatorum. 1. Petr. 4. v. 8. Et de observatione mandatorum. *Si vis ad vitam ingredi, serva mandata.* Et de alijs bonis operibus. *Et qui bonum egerint, ibunt in vitam æternam.* De Pœnitentia. *Nisi pœnitentiam egeritis, omnes similiter peribitis.* Misericordia. *Misericordiâ & veritate redimitur iniquitas* Prov. 16. v. 6. Eleëmofyna. Eleëmofyna ab omni peccato, & à morte liberat. Item quod superest date Eleëmofyna.

E7

mosy




*mosynam, & ecce omnia munda sunt vobis. De Condonatione inimicorū. Dimitte & dimittemini. Luc. 6. v. 37. Si dimiseritis hominibus peccata eorum, dimittet & vobis Pater vestrer delicta vestra. Matth. 6. v. 14. Melius ergo & tutius esse iudicavi Doctrinam Catholicorum sequi, qui docent: Fidem quidem necessariam esse ad salutem, sed non excludi Spem, & Charitatem, aliaque bona opera. Nam ut S. Paulus habet: Fides, Spes & Charitas tria haec, (necessaria sunt ad salutem). Et alibi sic: Si Fidem habeam, ita ut montes transferam, Charitatem autem non habuero, nihil sum. Si autem hoc admittatur (uti admitti debet) Igitur falsum est quod sola Fides sufficiat ad salutem. Falsum item, quod alia bona opera non sint utilia ad salutem. Falsum denique, quod omnia nostra bona opera sint peccata, peccata siqui-*

*quidem non sunt utilia ad salutem, sed sunt media ad aeternam damnationem.*

# CONSIDERATIO L.

**N**ON paticos observavi Acatholicos, qui est in vita fuerint pertinacissimi in suis sectis, postea tamen ubi ventum est ad articulum mortis convertebantur, & desiderabant mori in Fide Catholica. Contra nullum Catholicum notavi, qui ad extrema deveniens, optasset in Religione Acatholica mori, cum tamen in hora mortis maximè aperi-antur homini Christiano, mentis oculi, circa ea quæ concernunt aeternam animæ salutē. Ego autē sic vivere statui, sicut vellem mori. Igitur maturē Fidem Catholicā amplecti decrevi. Siquidem sicut mors est certissima, Ita hora mortis est incertissima. His accessit, quod Catholici

ci cum quibus de mea conversione  
egi, hanc dabant mihi affecuratio-  
nem : quòd si propter susceptam Fi-  
dem Catholicam damnari deberem,  
ipsi parati sint pro me in die judicij  
respondere, & damnationem ater-  
nam loco mei, vel mecum subire.  
qualem affecurationem non potui  
obtinere vel extorquere ab aliarum  
sectarum Prædicantibus ; si in illorū  
secta vixero & mortuus fuero. Unde  
conclusi firmioribus fundamentis  
niti Fidem Romano-Catholicam  
quàm alias sectas à Fide  
Romano-Catholica  
alienas.



EPI.



# EPILOCUS

SEU  
RECAPITULATIO  
RATIONUM & MOTIVORUM,

*Cur Fides Romano-Catholica sit  
eligenda & amplectenda ac alijs  
omnibus modernis Fidei Reli-  
gionibus præferenda.*

**N**E temerè vel alios aliquos ob  
fines, vel vanas spes, putetis  
me Fidem Romano-Catholicam  
amplexum fuisse, & vestras tan-  
quam falsas ac impostorias Religi-  
ones rejecisse, Sodales Amici mei  
Carissimi, Rationes & Motiva meæ  
conversionis vobis hîc in compen-  
dio adduco, & recapitulo.

Sum

Sum igitur ex vestra (quam quidem vos, malè persuasi Evangelicam vocatis) religione, ad Fidem Romano-Catholicam conversus.

*Primo* ex eo, quod vos Lutherani & Calvinistæ in Hungaria, unum statum Evangelicum constitutere vultis, quod sanè mihi videbatur esse inconceptibile. Cum enim in multis articulis Fidei, inter vos diffformes & prorsus oppositi sitis, capere planè non potui, quomodo ambæ vestræ inter se contrariæ doctrinæ, possint eidem Evangelio esse conformes? Quæ enim sunt diversa inter se, eadem uni tertio, per omnia non possunt esse conformia, uti ipsum lumen rationis dicat.

*Secundò*. Quod si autem alterutra ex his duabus Religionibus est conformis Evangelio, adeoq; Evangelica, deberet id probare una V.G. Lutherana, de sua Religione tali argumen-

gumento, quo Calviniana Religio non posset æquè ac eodem jure uti pro probanda sua Religione quòd sit Evangelica; Et è contra. Tale autem argumentum neutra pars potest pro se adducere. Ergo non habui rationem, cur potius debetem esse Lutheranus, quàm Calvinista, nec è contra, & cur potius hanc, quàm illam judicaret esse Evangelicam.

*Tertio*. Quia non vidi rationem, cur soli Lutherani vocent se *Evangelicos*, & Calvinistæ *Reformate Religionis*, & non debeant sic vocari etiam Anabaptistæ & novi Ariani seu Unitarii. Ab illis siquidem non adfertur tale argumentum, hujus denominationis, quod ab his, non possit æquè ac eodem jure pro suis sectis applicari. Cum igitur non sit major ratio pro Lutheranis vel Calvinistis, quàm pro Anabaptistis & Arianis, vel quibusvis modernis sectariis



stariis, quos Lutherani ac Calvinistæ excludunt ab his novitiis Titulis, ipsi quoque Lutherani & Calvinistæ, nec quo ad rem. nec quo ad denominationem, possunt dici Evangelici, vel Reformatæ Religionis. Ergo meritò has omnes sectas, utpotè earundem quiesquiliarum, rejeci.

*Quartò.* Quia constabat mihi multos, qui in Fide Romano-Catholica vixerunt & mortui sunt, salvatos esse ut vosmetipsi id fatemini. An autè aliquis sit salvatus ex aliis modernis sectis, nec quidem vobis ipsis constat. Securiorē igitur viam ad salutem volui mihi eligere.

*Quintò.* Imò hinc inferebam, vel ex eo Romano-Catholicam Fidem esse veram: Nam sine vera fide non potest quis placere Deo, omnis autem qui salvatur placet DEO. Ergo cum multi salvati sint in Fide Ro-

mano-

mano-Catholica, eam veram Fidem & salvificam oportet esse.

*Sextò.* Indè ulterius deducebam. Quòd cum Romano-Catholica Fides sit salvifica adeoque vera, omnes ab ea diversæ, Religiones sint falsæ, siquidem una tantum Fides est vera ac salvifica, sicut unus tantum est verus DEUS.

*Septimò.* Quia Catholicos posse salvari in sua Religione non solum ipsi Catholici constanter asserunt, sed Acatholici etiam ultra concedunt. In alia autem Religione aliquem salvari posse, soli Acatholici, idq; singuli de suis sectis ominantur & dicunt, quod Catholici absolute negant. Id verò quòd utraq; pars etiam sibi adversa concedit, certius est, quàm id quod una tantum asserit, altera autem negat omninò. Ergo securius operari volens rationabiliter feci, quòd Fidem Ro-

mano-

mano-Catholicam, cæteris omnibus prætulærim.

*Octavo.* Quia consulendo veterum ac primitivæ Ecclesiæ SS. Patrum scripta, ab iisdem solam Romano-Catholicam intellexi extolli, svaderi, laudari, reliquas verò omnes ab ea alienas reïci & damnari. Horum igitur prudentissimum consilium ac iudicium statui sequi.

*Nonò.* Quia omnes Sancti & Sanctæ, qui & quæ fuerunt ab instituta Ecclesia à Christo usque ad præsens Tempus, fuerunt ac vixerunt in Ecclesia Romano-Catholica.

*Decimò* Quia in Testimonium veritatis hujus Religionis, subierunt tot milia Martyrum, durissimam mortem ac sanguinem suum profuderunt.

*Undecimò.* Quia omnes qui hanc Ecclesiam impugnarunt, & ab ea recesserunt, ut Arius, Machometes,

tes, Pelagius, Marcion, Macedonius &c. æternis ignibus addicti sunt uti & eorum sequaces. Tales autem Hæresiarchæ fuerunt & Lutherus ac Calvinus, ac alii Inventores modernarum sectarum; nolui proinde me periculo æternæ damnationis illos sequendo exponere, neque enim vidi rationem, Cur Pelagius & Arius sint Hæresiarchæ & non Lutherus ac Calvinus.

*Duodecimò.* Quia Romana Fides fuit eadem cum Fide S. Pauli, ipso S. Apostolo attestante. Ad Rom I. v. 2. Cur igitur debuissèm quærere aliam Fidem, quàm quæ fuit S. Pauli.

*Decimotertio* Quia si Romano-Catholicam Fidem, non prælegissem, nunquam electionum inter alias Religiones Fidei, finem cum animæ meæ quiete fecissem, semper enim dubitassèm, quoniam ex tot ac tam variis sectis sit vera fides ac salvifica.

*Deci-*

*Decimoquartò.* Quia doctrinæ aliarum Religionum continent plurima paradoxa incredibila, & rectæ rationi prorsus difformia, ut patet ex consideratione 15. 16. 17. & 18.

*Decimonond.* Quia omnes moderatæ Religiones diversæ à Religione Romano-Catholica sunt novæ & tales quas nemo tenuit, docuit, aut secutus est, ante annū 1517. ut patet ex Consideratione 19. & 20.

*Vigesimò.* Quia omnes hæ novæ Religiones, sunt tantum ex antiquis hæresibus jam pridem ab Ecclesia diversis temporibus condemnatis confarcinatæ, & quidē ineptissimæ.

*Vigesimosecundò.* Quia soli Ecclesiæ Romano-Catholicæ conveniunt & quidem amptissimè, *Nota* veræ Christi Ecclesiæ, nempe quod sit una, Sancta, Apostolica & Catholica seu universalis,

*Vigesimotertio.* Quia ad hanc so-

lam

lam conversæ sunt, & defacto convertuntur omnes gentes & populi, ex Gentilismo & Paganismo ad eandem.

*Vigesimoquartò.* Quia antesignani modernarum Religionum, nullo signo seu miraculo, probârunt vel probare poterant se à Deo missos: ad Reformationem Ecclesiæ.

*Vigesimoquintò.* Quia iidem Antesignani fuere homines carnales, votifragi, Apostata, impij, blasphemæ ac scurriles.

*Vigesimosexto.* Quia hæ Religiones nunquam laborant in Gentilium ad Christi Fidem conversione, sed solum in tepidorum Catholicorum perversione.

*Vigesimoseptimò.* Quia in Romano-Catholica Ecclesia, multæ personæ ex utroque sexu etiam maximi stēmat, & summarū divitiarū, se obsequijs Divinis ultrò consecrāt,

F

vi-



vitamque suā in paupertate voluntaria, & intaminata castitate transigunt. In alijs verò Religionibus fidei, nemo magnarum fortunarum statum Prædicantium assumere dignatur, nemo ex his se ad continentiam resolvit, unde constat horū plebsq; ex sola necessitate munus hoc obire; illos verò ex amore solius Dei & salutis animæ suæ, & fidei veritate, ad tales status, se Deo cōsecrare.

*Vigesimo octavo.* Quia cōtinentia quæ est donū Dei, nulli unquā Prædicanti à Deo confertur, cū tamen in Religione Romano-Catholica tot sint Religiosi & Religiosæ, quæ nō tantum continentiam, sed & intaminatā virginitatem, per Dei gratiam usq; ad finem vitæ conservāt.

*Vigesimo nono.* Quia scriptores A-catholici, plerisq; Argumentis suis, dum oppugnant Catholicos, ea impugnant, quæ illi non negant ( ut

sic

sic eos in odium apud plebē inducant ) & ipsam Catholicam doctrinam prout ea apud eos docetur, vix attingunt, aut attingere audent.

*Trigesimo.* Quia iidē, contra Catholicos magis Calumnijs & manifestis mendacijs agunt, quàm solidis argumentis.

*Trigesimo primo.* Quia è contra A-catholici, Catholicorum contra se argumenta, vel non solvunt, vel statim ad aliam controversificam materiam transeunt.

*Trigesimo secundo.* Quia novæ hæ Religionēs pro libitu suo: Sacræ Scripturæ libros è Canone Sacrorū librorum eliminant, & alios, pro suo arbitrio vertunt ac interpretantur, & quidem unusquisque juxta proprium suum sensum; cum tamen inter Catholicos, idem est scripturæ Sacræ librorum Canon, eadē versio, idem sensus, & eadē interpretatio.

F2

Tr

*Trigesimo tertio.* Quia novæ hæ Religiones in ipsis articulis fidei plurimū inter se differunt, etiam ipsi qui sub eodem nomine continētur, imò & in ipsis Catechismis quibus pueris rudimenta fidei traduntur.

*Trigesimo quarto.* Quia ipsæ Augustanæ confessiones, quas pro fundamento suæ Religionis Lutherani habent, maximè inter se differūt, & à prima illa originali Augustana confessione discrepant.

*Trigesimo quinto.* Quia novæ hæ Religiones aperiunt latam ac spatiosam viam, ad omnem licentiam carnis & voluptatum, cum tamen Christus docuerit arctam esse & angustam viam ad Cælum.

*Trigesimo sexto.* Quia earundem defensores plurima scripturæ sacræ loca ac Textus detruncant, aliqua addunt, & ea ex suo proprio sensu interpretantur, insuper aliqua deprav-

vant

& corrumpunt, vide Considerationem xxxvi.

*Trigesimo septimo.* Quia Religiones à Romano-Catholica alienæ, non sunt institutæ à Christo, nec habent successionem suæ doctrinæ, & Pastorum, à temporibus Apostolorum.

*Trigesimo octavo.* Quia in scripturæ sacræ interpretatione inter se discrepant, ut patet ex Consideratione 38. 39. 40.

*Quadragesimo primo.* Quia omnes res vetustæ, omnia veterum scripta, solam Romano-Catholicam Ecclesiam fuisse in Christianitate radicatam & firmatam testantur.

*Quadragesimo secundo.* Quia Romana Ecclesia esto hæcenus fuerit, jam inde à sui initio oppugnata à diversis Tyrannis, Ethnicis, Paganis & hæreticis, semper tamen mansit inconcussa & nunc quoque ma-

F3

net,

net, cū tamen hærefes aliæ, sicut exortæ sunt, sic etiam interierunt.

*Quadragesimo tertio.* Quia apud Acatolicos nulla est doctrina asce-  
tica, hoc est talis, quæ tractaret de  
perfectiōe & exercitio virtutum  
Christianarum, uti nec, ulla scien-  
tia de rebus moralibus seu obser-  
vatione legum Divinarum, sed o-  
mnia permittuntur desiderijs &  
concupiscentijs depravatissimæ na-  
turæ humanæ.

*Quadragesimo quarto.* Quia con-  
ciliabula Acatolicorum etiam illa:  
in quibus modernarum Religionū  
cuzæ sunt confessiones seu professi-  
ones, nec quidem minimam com-  
parationem habere possunt sive  
quoad doctrinam, sive quoad san-  
ctitatem ac virtutes, sive quoad  
nationum varietatem cum concili-  
ijs Generalibus Ecclesiæ Romano-  
Catholicæ, & Patribus qui eisdem  
interfuerunt.

Qua-

*Quadragesimo quinto.* Quia prin-  
cipia Acatolicorum non sunt apta  
ad formandam conscientiam bonā,  
homine Christiano dignam.

*Quadragesimo sexto.* Quia Prædi-  
cantes earum, solum ea proferunt,  
quæ sunt in contemptum Religio-  
nis Catholicæ, alia autem quæ sunt  
in sua Religione gravissima, & in  
perditionem manifestam animarū  
ipsis subjectarū, penitus dissimulāt.

*Quadragesimo septimo.* Quia ij qui  
inter Catholicos judicantur esse  
pessimi & tepidissimi, inter Aca-  
tholicos judicantur esse optimi &  
ferventissimi.

*Quadragesimo octavo.* Quia nemo  
est, qui ex Fide Romano-Catholi-  
ca deficit ad alienas Religiones mo-  
dernas, ex eo ut in ijs fiat melior, sed  
ut laxius & licetiosius vivere possit.

*Quadragesimo nono.* Quia cū  
tam clara sint Testimonia Scripturæ

F4

Sacræ,



Sacræ, de Spe, Charitate, pœnitentia, Eleemosyna, & operibus misericordiæ; quod sint proficua ad vitam æternam obtinendā, ac de ipsa Fide. Hæc tamen omnia contemnūt moderni Novatores, & solum fidem ad salutem sufficientem esse docent.

*Quinquagesimo.* Quia etiam pertinacissimi Hæretici sæpius deliderant mori in Fide Catholica ac etiam moriuntur. Nullus autem Catholicus optat mori in fide à Romano-Catholica aliena.

His addo. Quod mihi vehementer semper displicuit in Prædicantibus sectariorum, qui dum merita Christi ac satisfactionem, mirè extollunt, imitationem vitæ illius, auditoribus suis proponere aut svadere penitus negligunt, quin eisdem prætensionem & ansam præbeant, ut de cavendis peccatis, & pœnitentia agenda, pro

com-

commisiss, minimè sint solliciti, uti & de exercitijs virtutum ac bonorum operum, id pro se allegando, quod Christus Dominus abundè jam sua morte sanctissima pro peccatis nostris satisfecerit, & Regnum Cœlorum nobis promeritus sit. Atq; sic Passionem ac mortem Christi, ac illius satisfactionem, in vitæ licentiam sibi assumunt. Orthodoxa autem doctrina est: Christi quidem mortem ac Passionem esse sufficientissimam ex se, pro peccatis nostris, & totius humani generis, ac infiniti prorsus meriti extendentis se ad omne omnino præmium possibile, nihilominus Christum voluisse, illius fructum applicare nobis, ita ut nos imitando virtutes illius, ejusdè Passioni cooperemur. Duplex siquidem fuit Finis, adventus Christi Domini, in hunc Mundum;

dum; primis ut ut pro peccatis  
 nostris satisfaceret & ab æterna  
 damnatione nos eriperet. Alter  
 vero; ut perfectissimum omnium  
 virtutum exemplar nobis daret,  
 & ad sui imitationem nos addu-  
 ceret, Quem finem ipsemet Chri-  
 stus his verbis declarat. *Exem-  
 plum dedi vobis, ut quemadmodum  
 ego feci, ita & vos faciatis.* Joann.  
 13. v. 15. Et apud Matthæum 11.  
 v. 29. *Discite a me, quia mitis sum,  
 & humilis corde.* Et S. Petrus pri-  
 mæ Capit. 2. v. 21. *Christus passus  
 est pro nobis, vobis relinquens exemplū,  
 ut sequamini vestigia ejus.*

Hic ego jam vos alloquor, olim  
 mei in Religione Consodales &  
 nunc quoq; amici, cognati & pa-  
 triotæ charissimi, atq; per Deum  
 obtestor, per quinque vulnera  
 Christi ac sanguinem illius preti-  
 osum quò redempti sumus,  
 per-

per; salutem animarum vestrarum æter-  
 na n, obsecro. Soluite certam vi-  
 am ad cælum relinquere pro in-  
 certa. Rêcogitate ad quam fidem  
 Antecessores vestri & primi Chri-  
 stiani nationis vestræ ex Gentili-  
 smo conversi sunt. Perpendite in  
 qua fide Sancti illi, quos etiam  
 vos pro talibus habetis vixerunt.  
 Considerate hæc motiva meæ cõ-  
 versionis, vobis sincerissimo affe-  
 ctu allata: & revertimini ad fidem  
 veterem, ad viam Patrum, ad se-  
 mitas Sanctorum, ad Religionem  
 illam quæ tot sæculis viguit, cujus  
 veritas tot Martyrum sanguine fir-  
 mata est. Quam omnes Sancti ve-  
 teres Patres primitivæ Ecclesiæ de-  
 fendunt & approbant, contra quā  
 nec portæ inferi (ex ipsius Christi  
 promissione) prævalebunt. Con-  
 sulite animabus vestris. Habete  
 præ oculis salutem animarum ve-  
 strarum.

Ararum. Quid enim proderit homini si universum mundum lucretur & animæ suæ detrimentum faciat, aut quam dabit commutationem quis pro anima sua? Unicam habemus animam, de cujus æterna fœlicitate hic agitur. Salus æterna non acquiritur sine vera fide. Fides autem vera, est unica, quæ non est alia quàm Catholica. Hanc ergo sequimini, nequæ in ea complectenda imitemini. Deus det vobis hanc gratiam, ut per veram Fidem unanimiter ambulemus ad felicitatem æternitatem.

*Omnis plantatio quam non plantavit  
Pater meus Cœlestis eradicabitur.  
Matth. 15. v. 13.*

FINIS.



90—

080404

11X7

ritius Dux S  
clesiasticus.  
March

atinus Poloc  
D. L.  
nus Belzensis  
tinus Belzens



